

**Zeitschrift:** Annalas da la Societad Retorumantscha  
**Herausgeber:** Societad Retorumantscha  
**Band:** 82 (1969)

**Artikel:** Nova contribuziun per la biografia da pader Placi Spescha  
**Autor:** Müller, Iso / Maissen, F.  
**DOI:** <https://doi.org/10.5169/seals-228786>

### **Nutzungsbedingungen**

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

### **Conditions d'utilisation**

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

### **Terms of use**

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

**Download PDF:** 02.04.2026

**ETH-Bibliothek Zürich, E-Periodica, <https://www.e-periodica.ch>**

# Nova contribuziun per la biografia da pader Placi Spescha

*da P. Iso Müller*

*en romontsch da F. Maissen*

El tom 77 dallas Annalas, annada 1964, pag. 130—144 ei comparida ina emprema lavur davart la «Famiglia e giuventetgna da P. Placi Spescha.» Nus empruein da rabbitschar la biografia dil meriteivel scrutatur puspei in toc anavon. Ei sa denton buca settractar d'in maletg cumplet.

## *1. En claustra a Mustér da 1782—1799*

Ils 25 da november 1782 ha P. Placi bandunau definitivamein Nossadunneun, nua ch'el ha saviu emprender ton, per puspei returnar en sia carezada patria claustrala. Ins ha cartiu ch'el seigi lu staus el hospezi da S. Gion enta Medel.<sup>1</sup> Mo quei sa esser stau mo ina cuorta dimora, leu era gie negina caplania. Dapli siu retuorn entscheivan ils *viadis* pils cuolms, che ein enconuschents, mo che vegnevan fatgs en certs intervals.<sup>2</sup> Els ein negin mussament che «la cella claustrala era par'ei memia stretga» al giuven conventual.<sup>3</sup> Il malrueisseivel P. Placi da pli tard era tut in auter ch'il giuven pader. Igl ei era clar, ch'in scrutatur dalla natira sa buca pertgitar sia cella sco in archivar. Lu ha el survegni digl avat la lubientscha dad interpretar 1789 ina

---

<sup>1</sup> Pieth-Hager, P. Placidus a Spescha 1913, pg. XI. Quest'ovra vegn citada da cheu naven mo: Spescha.

<sup>2</sup> Spescha 461

<sup>3</sup> Spescha XI

pli gronda excursiun els cuolms.<sup>4</sup> Spescha ei mo selamentaus 1791 ch'igl avat lubeschi buca ad el in viadi els cuolms valisans.<sup>5</sup> La restricziun ei capeivla. Igl alpinissem era da quei temps aunc ina novissima scienza. P. Placi prendeva siu brevier cun el sils cuolms ed ha urau ses psalms 1792 sil spitg dil Pez Ault sin 3033 meters.<sup>6</sup>

Spescha rimnava era cristallas gia dapi 1782.<sup>7</sup> S'entelli ch'ei de-va gia ina collecziun da naturalias. Il professor e miedi da Tübingen, Konrad Christian Storr, che ha visitau Mustér 1784, rapporta denton nuot surlunder, mo el raquenta ch'igl avat Columban Sozzi hagi bia interess per «remarcablads dalla natira».<sup>8</sup> E lu di Spescha 1790, che quella toccamenta meretti atgnamein buca il num collecziun.<sup>9</sup>

Il pli fetg lauda il professor da filosofia Christoph Meiners da Göttingen nies conventual da Mustér. El glorifichescha el sco in dils pli «versai alpinists ed experimentai culs cuolms digl entir Grischun». Ad el seigi per da cuort reussiu dad ascender il Tödi, vul dir mo il Stocgrond. Meiners vessi survegniu da Spescha aunc pli crappa e cristallas, sch'el vessi buca temiu, che ses cavals vegniessien engravigiai memia zun sin las vias maltscheccas.<sup>10</sup> Ord ina brev entochen ussa nunenconuschenta dils 28 da settember 1788, che Spescha haveva scret al historicher da Rheinau, P. Moritz von der Meer, vesein nus, che la collecziun da mineralias ei buca mo vegnida lubida ad el, anzi schizun vegnida recumandada. Cheu rapporta el era dad in toc, che pesavi 10 funds.<sup>11</sup> La stad 1790 ha il talentau pictur Karl

<sup>4</sup> Spescha 310

<sup>5</sup> Spescha 454

<sup>6</sup> Spescha 332

<sup>7</sup> Spescha XXXXVIII. Citat ord B 2014 pg. 2

<sup>8</sup> G.K. Storr, Alpenreise 2 (1786) 128

<sup>9</sup> Spescha 450

<sup>10</sup> C. Meiners, Briefe über die Schweiz 3 (1791) 210 = Spescha 343—344

<sup>11</sup> Archiv da Nossadunnaun, Miscellanea van der Meer, R 91, Tom X pg. 714—719: «Hochwürdiger, hochgelehrter Herr! Die Weigerung meiner gemeinen Kristallstücke hat die erwünschteste Bewirkung gehabt, denn meine Sammlung war nicht nur gebillichet, sondern auch anbefohlen, und ich besitze nun schon wirklich einen Vorrath an Kristall- und anderen Naturalienstücke, die mich ungemein erfreuen. Sollte ich aber dennoch etwas seltenes, das über mein Vermögen wäre, oder etwas solches, das ich doppelt besässe, zu Händen kommen, so werde ich immer zu meinen grössten Vergnügen rechnen, Ihnen damit aufzuwarten. Wirklich ist ein Stück Kristall, der ungefähr 10 Pf. wiegt und von seltener Schönheit ist, gefunden worden. Man kann ihn aber nicht wohlfeiler als um 3 1/2 Louisd'or haben. Ich habe indessen die Ehre, mich zu empfehlen und mit vollkommener Hochachtung stets zu seyn Euer Hochwürden ergebenster Diener P. Placidus Spescha, Stift Disentis, den 28 ten Herbstmonat 1788.»

Gotthard Grass visitau la claustra e Spescha ha ritschiert el amicabla-  
mein ed ha mussau ad el sia entira collecziun e buc il davos era sias  
cartas.<sup>12</sup>

P. Placi era schiglioc era occupaus en claustra cun nizeivlas la-  
vurs. Aschia eis el documentaus sco *secretari* digl avat Columban  
Sozzi ils 8 da fevrer 1783.<sup>13</sup> Lu anflein nus el sco *bibliotecari* sut la  
direcziun da P. Fintan Birchler, in pader da Rheinau, che funciona-  
va a Mustér sco pader decan.<sup>14</sup> Buca per nuot compara Spescha 1790  
sco commember dalla societad da *bibliotecaris* a Cuera (Churer Bi-  
bliotheksgesellschaft), che formava el medem temps era in cerchel da  
discussiun sut la direcziun da Johann Baptist von Tschärner, in fautor  
dil «sclariment» franzos e dalla centralisaziun democratica.<sup>15</sup> Cura  
ch'il suranumnau pictur Grass ha visitau 1790 la claustra, veva Spe-  
scha da ver quitau da cuschina e tschaler e da retscheiver ils hosps.<sup>16</sup>  
1792/93 manischava el sco *econom* (Stathalter) ed en tal uffeci ha el,  
tenor siu agen dir, piars nuot auter che sia corpulenza.<sup>17</sup> Dasperas  
gidava el continuadamein ora ella *pastoraziun*. Schegie ch'igl uestg da  
Cuera, cont Dionis von Rost, deva buca la lubientscha da gidar en

---

<sup>12</sup> Tagebuch einer Wanderung von Chur auf den Gothard, Furka, Grimsel, Gemmi bis zum Montblanc im Jahre 1790. Bibliothek der Schweizerischen Staatskunde 5 (1797) 60: «Er ist ein grosser Freund der Naturgeschichte und besitzt eine gutgewählte Büchersammlung in diesem Fach. Seine Sammlung von Mineralien und Crystallen ist beträchtlich. Er wollte auch Golderz und Aquamarine gefunden haben, welches ich aber nicht dafür halten konnte. Die mehresten umliegenden Berge hat /S. 61/ er bereist, weitläufig beschrieben und Charten davon gemacht und die Berge gemessen, auch ein eignes Instrument dazu erfunden, von dessen Genauigkeit ich nicht urtheilen kann. Nach seinen neuesten Beobachtungen hält er den Pizbrenng (!) gegen Glarus für den höchsten Berg in dieser Gegend. Er bat mich, wenn ich Liebhaber von Mineralien wüsste, sie ihm zuzuweisen, weil er viel Geld in die Sache gesteckt hatte.» Sur da Grass mira Schweizerisches Künstlerlexikon 1 (1905) 617—618

<sup>13</sup> Archiv episcopal Cuera, mappa Breil, ils 8 da fevrer 1783: «P. Placidus Spescha pro Secret(arius).» Comp. Zeitschrift der Savigny-Stiftung für Rechtsgeschichte, Kan.Abt.82 (1965) 165, 185

<sup>14</sup> Archiv cant. Aarau, acts da Muri 6126 pg. 397, Avat Laurentius agl avat da Nossadunnaun. 3.VII/8. VIII. 1786: «Der Herr Decan und der Herr Placi werden die Bibliothek in eine bessere Ordnung bringen».

<sup>15</sup> A. Rufer, Johann Baptist von Tschärner 1751—1835. 1963, pg. 87

<sup>16</sup> Bibliothek der Schweizerischen Staatskunde 5 (1797) 61: «Ich hatte vom Herrn Landrichter Caprez eine Empfehlung an den Pater Placidus, der Kirchen [Küchen-] oder Kellermeister ist, und wurde von ihm äusserst höflich empfangen, ja er versäumte sogar meiner willen die Mittagsmahlzeit, nachdem er mir angeboten hatte, ob ich dort speisen wolle.»

<sup>17</sup> Spescha pg. 70, 462 remarca

pastoraziun e prolungeva era buca quella, senza ch'ins dumandavi persunter persunalmein el palast episcopal, ha el dau a P. Placi siu consentiment leutier senza che quel supplicheschi persunter.<sup>18</sup>

Denton ha ei dau en claustra bein enqual midada. Da 1780—1786 ha il conventual da Faveras, *P. Antonin Regli*, administrau la abbazia da Mustér, per commissiun dalla congregaziun svizra dils benedictins. Spescha fa ad el reproschas, ch'el tegni sut ils indigens e ch'el supprimi il romontsch.<sup>19</sup> Gia in onn pli baul era avat Columban Sozzi sere-tratgs sut squetsch dalla congregaziun da siu uffeci. Spescha veva dad engraziar a quel bia e tuttina eis el buca senuspius da descriver sias fleivleziass economicas e disciplinaras.<sup>20</sup> Sco niev avat ei il pader da Nossadunneun, Laurentius Cathomen (1785—1801) da Breil, vegnius elegius. Quel era bein in exemplaric conventual, mo el scumiava memia savens ses officials e vuleva isolar anguschusamein sia claustra. Per Spescha era el simplamein in inimitg dallas novas ideas, schebein che quella defensiun mava dil tuttafatg a prau cun il conclus dalla congregaziun da 1768. Spescha veseva el niev avat quasi mo igl «inimig dils cudischs novs»,<sup>21</sup> e tals possedeveva pader Placi biars, che vevan sco ei para buca mo character scientific mobein general. El ha deplorau zun fetg, ch'igl ei barschau ad el 1799 buca meins che 300 dils megliers ed exquisits cudischs.<sup>22</sup>

La sort che Mustér ha giu 1799 ei enconuschenta. Con bein che Spescha ha previu il disletg e co el era sespruau da zuppentar las reliquias, ha el sez descret.<sup>23</sup> Cura ch'el ha viu la claustra en flommas, era el consternius profundamein. («Welcher Herzstoss»). El ei staus igl emprem che ha encuretge da tgirar la claustra bandunada.<sup>24</sup> Era da quels temps turbulents sespruava el dad ademplir sias obligaziuns religiosas e da buca tralasar la celebrazion dalla s. messa, aschia a Cuera, ella caplutta da S. Placi a Mustér ed a

---

<sup>18</sup> Archiv episcopal Cuera, Prot. Cels. 1787—1789 pg. 437. Uestg agl avat ils 10 da mars 1789

<sup>19</sup> Spescha 67, leutier Iso Müller, *Die Fürstabtei Disentis im ausgehenden 18. Jahrhundert*, 1963, pg. 121

<sup>20</sup> Spescha 64 s. *Fürstabtei* 1.c. pg. 154 s.

<sup>21</sup> Spescha 69. *Fürstabtei* 1.c. pg. 160—161, 183—184

<sup>22</sup> Spescha 90

<sup>23</sup> Spescha 94—95, 113—114

<sup>24</sup> Spescha 98—101

Domat.<sup>25</sup> Cun tgei perschasiun ha el vuliu documentar ad Innsbruck 1799, ch'el seigi spiritual e ch'el sappi e vegli celebrar la messa.<sup>26</sup> El ei vegnius exiliaus dils Austriacs sut la reproscha, chel hagi favorisau l'armada franzosa. Denton en ses priedis veva el buca adina giu prudenta retenientscha. Ins patratgi a siu priedi pil di da s. Barclamiu a Puzsatsch (Vrin) 1799, che taccava il tema: Nolite confidere in principibus (Ps. 145).<sup>27</sup> Dalla stad 1799 tochen la primavera 1801 eis el staus ella claustra da servits ad Innsbruck. Da leu anora ha el explorau il mund alpin tiroles e cheutras slargiau ventireivlamein siu horizont. La lontananza da tut quei che era ad el car, ha profundiu el «Jeu sun mai staus in aschi ver muntg sco ual ussa, jeu hai bandunau tut, snegau tut ed hai cheutras piars nuot, perquei che jeu vevel nuot.»<sup>28</sup> Cura ch'el ei lu returnaus, eis ei semussau, ch'el era internamein daventaus jasters al convent, bein pervia dallas divergentas opiniuns en contradicziun cun ses confrars — era el gie amitg dils franzos — e pervia dalla liunga deportaziun ch'el attribueva ad ina denunziaziun da P. Adalgott Waller.<sup>29</sup>

## 2. *A Rumein 1801—1804*

Al capetel dils paders dils 30 da mars 1801 ei P. Placi comparius ed ha selamentau, ch'igl avat, ch'era morts ils 9 da fevrer da quei onn, hagi mai scret ad el ina brev egl exil e mai dau ad el in agid. El seigi ussa cargaus cun deivets, cun quei ch'el hagi stoviu cumprar caussas necessarias, sco vestgadira ed auter. P. Placi ha giavischau da vegnir liberaus da quei buordi. Ins dueigi dar ad el in cunvegnient susteniment. Il capetel ha rispundiu, el hagi quitau pil necessari per tuts capitulars e vegni era a pagar ils deivets dad Innsbruck.<sup>30</sup> Ad interim

<sup>25</sup> Spescha 91, 119, 124

<sup>26</sup> Spescha 127. Comp. mappa Anselm Huonder, brev a Joh. Bapt. Messmer, Decanus et urbis parochus, 22. fevrer 1801

<sup>27</sup> Spescha 121

<sup>28</sup> Spescha 118

<sup>29</sup> Spescha 91 s.

<sup>30</sup> Acta Capitularia I, pg. 23. Nus citein questa impurtonta fontauna screta en lungatg latin cun AC. Pertuccont il datum da quest capetel e ses eveniments mira Festschrift Oskar Vasella, 1964, pg. 505 e Zeitschrift für Schweizerische Kirchengeschichte 59 (1965) 124

ha Spescha survegniu il benefeci da Rumein.<sup>31</sup> Mo quei tunscheva par'ei tuttina buc ed aschia ha el tschentau al pader decan Baseli Veith diversas pretensiuns, che quel ha presentau al capetel ils 14 da settember 1801 a Trun. Il decan ha denton tschentau a Spescha la damonda decisiva e principiala, schebein el vegli restar en buns e schliats dis, sco mintga auter conventual fideivels al convent. Sin quei ha el rispundiu: «el vegli s'adattar en tuts giests e raschuneivels graus al beinmanegiar dil convent, hagi denton era la speranza, che quel vegli tractar el en buns e schliats dis sco conventual da Mustér.» Quei era per aschidadir ina renovaziun dil profess claustral, e muossa tuttina aunc ina sauna tenientscha.

P. Placi ha giavischau da survegnir l'administraziun dils beins claustrals enta Medel, per saver reconquistar sco administratur ils beins claustrals, alienai malgrad siu protest ed en disfavour dalla claustra. Per siu susteniment duei igl econom dalla claustra ver quita. Il capetel ha consentiu aschi lunsch ch'el ha vuliu surdar a P. Placi il hospezi da S. Maria cun ses beins a S. Gion. Ils beins a S. Gagl dueva P. Gallus Soliva survegnir. Essend che la claustra era dapli il barschament buca pli habitabla, prendevans ins da quei temps talas sligiaziuns. Era han ins empermess a P. Placi sin d'atun tras igl econom duas vaccas ed auter per siu susteniment. Dil reminent ha il capetel considerau sco siu dretg, da cumprar, vender e contrahar. Surlunder ei P. Placi sevilentaus fetg. El ha presentau ina brev per preleger, tenor la quala mistral Gieli Caduff da Lumnezia ha detg, las tgisas dils da Rumein encunter P. Placi seigien faulsas. Ils da Rumein eran seviults en scret cun tgisas direct agl administratur claustral P. Anselm Huonder. La finala vuleva ins aunc surdar a P. Placi il hospezi da S. Gagl, per quietar el. Ils 16 da settember eis el serendus cun siu survient or da Rumein a Medel, per inspectar ils hospezis al Lucmagn. Mo suenter siu retuorn ha el vuliu saver nuot pli da quels. A Rumein ha el suenter entgin temps survegniu digl administratur claustral P. Anselm Huonder la lubientscha dad adminstrar ils beins da Rumein independentamein.<sup>32</sup> Cheu entuppein nus il P. Placi da pli tard, returnaus digl exil, senza esser pertscharts dallas grondas difficultads economicas dalla claustra. Emigrants han breigia dad emblidar lur anteriurs bials temps.

<sup>31</sup> AC I 24 datum dils 11 da fenadur 1801

<sup>32</sup> AC I 28—30

Il niev beneficiat leva brattar beins tenor siu beinmanegiar. Alla fin dils 1801 ha il decan P. Veith termess a Spescha ina brev en num dil capetel, cun la quala el ha scumandau scadin brat e scadina vendita senza expressiva lubientscha dil capetel.<sup>33</sup> A Spescha ha quei imponiu pauc ed el ha priu la resoluziun, dad *acquistar Rumein sco administraziun independenta per el per veta duronta*. Encunter tut dretg ecclesiastic e tutta tradiziun monastica eis el per quei intent seviults alla autoritad seculara, numnadamein al departament da finanzas dalla constituziun Helvetica. Igl 1 da zercladur 1801 han Johann Rudolf Dolder, sco cau da quei departement, e Carl Müller-Friedberg, sco cau dalla «Domainen-Division», scret da Bern anora alla combra d'administraziun grischuna, che steva sut la direcziun da Joh. Bapt. Tscharner, che Spescha seigi «pervia da sias ideas liberalas» vegnius deportaus 1799 ed ins dueigi perquei laschar el per veta duronta sil benefeci da Rumein. Sias «distinguidas enconuschientschas e sia savida» meretien era quei risguard. La combra d'administraziun vegli s'adressar a Teodor de Castelberg, igl administratur, che la Helvetica haveva dau alla claustra, per che quel detti d'entellir quei alla claustra.<sup>34</sup> La combra d'administraziun a Cuera ha appellau en quei senn a Castelberg.<sup>35</sup>

En claustra eran ins fetg surstaus sur da quei pass temerari da Spescha ed ha fatg da saver a Castelberg, ch'ins sappi en claustra buca dispensar P. Placi da siu vut da paupradad e schar ad el dil tut maun liber a Rumein, tonpli ch'ils vischins da leu reproschien ad el negligientschas sco administratur e caplon.<sup>36</sup> Perquei ha igl administratur claustral rispundiu promptamein, ch'il departament da finanzas vessi buca dau «aschi prompt ed aschi decidu» in tal consentiment, sch'el vessi igl emprem tratg en las necessarias informaziuns. El ha era buca zuppentau, che P. Placi hagi teniu mal casa e leutier hagi el, tenor rapports, ch'el hagi numnadamein ord Lumnezia, «ina stoda

<sup>33</sup> AC I, 32

<sup>34</sup> Archiv cant. Cuera XIII. 13 b. Departement da finanzas helvetic alla administraziun retica, Bern, igl 1 da zercladur 1802. Original. Copia en mappa Cathomen. Cheutier AC I. 44-45

<sup>35</sup> Mappa avat Cathomen, Combra d'administraziun retica a Teodor de Castelberg, Cuera, ils 8 da zercladur 1802. Orig. Comp. Archiv cant. Cuera XIII 13 b. Sboz, leutier ella brev dil departement da finanzas alla combra d'administraziun digl 1. da zercladur 1802. Cheutier era AC I 45

<sup>36</sup> AC I 45-46

inclinaziun». Duei «la claustra purtar ils deivets d'in conventual buca suttafretgs alla subordinatiun claustrala ed el esser responsabels persuerter? Il benefeci audi alla claustra e quel che surprindi el, stoppi era purtar il buordi dalla pastoraziun.» «Sche P. Placi seigi als vischins buca d'engrau ord divers motivs e specialmein pervia da sia atgna moda el far e demanar, tgei fretg selai ei lu spetgar dalla pastoraaziun?»<sup>37</sup> La combra d'administraziun ha rispundiu ch'ella hagi empalau la caussa da P. Placi vinavon al departament da finanzas e spetgi la decisiun. Quel ha envidau Spescha da serender a Cuera per discuorer surlunder.<sup>38</sup>

Dolder e Müller-Friedberg han incaricau la combra d'administraziun a Cuera da far ina «inquisiziun nunpartischonta». Els dueigien procurar, che «ni in brav um d'ideas liberalas vegni persequitaus dalla claustra ni ch'in schliet conventual sappi segloriar cun la protecziun dalla regenza per disavantatg da quella.»<sup>39</sup> Ella risposta da Cuera vegn exprimiu che Spescha hagi survegniu il num d'in schliet administratur mo cheutras, che «el seigi in amitg dad experiments agricols e cumpri cudischs ed auters mieds per sia instrucziun e ch'el hagi cheutras fatg beinenqual expensa, che pari sfarlatem els egl da ses vischins».<sup>40</sup> Ins sappi buca inculpar Spescha d'ina schliata administraziun, ni ch'el seigi inclinaus al sfarlatar «essend ch'el meina ina veta fetg sempl da sper sias lavurs agronomas e ses studis. Era seigi alla

<sup>37</sup> Castelberg scriva a Cuera denter auter, che P. Placi tegni mal casa: «übel wirthschaftet, wozu er lauth Berichten, die ich habe, und deren im Lugnez vorfindlich sind, einen vorzüglichen Hang hat.» Duess: «die Tilgung deren allfähligen Schulden eines hiemit der klösterlichen Subordination nicht unterworffenen Religiösen dem Kloster zur Last fallen und er darum veranthwortlich seyn?» . . . «Wan nun der Pater Placidus Spescha denen Pfrundgenossen in Hinsicht verschiedener Ursachen und besonders wegen seiner einzelnen Arth zu denken und zu handeln nicht anständig were, was vor ein Nuzen liesse solches vor die Selsorg anhoffen? «Archiv cant. Cuera XIII 13 b. Teod. de Castelberg alla combra d'administraziun retica. Mustér, ils 13 da zercladur 1802. Orig.

<sup>38</sup> Mappa avat Cathomen. Combra d'administraziun retica a Teodor de Castelberg. Cuera, ils 15 da zercladur 1802. Orig. Sboz egl archiv cant. XIII 13 b.

<sup>39</sup> «. . . dass weder ein rechtschaffener und liberal denkender Mann mönchisch verfolgt werde, weder ein schlechter Mönch unter diesem Vorwande sich mit dem Schutze der Regierung zu ihrem Nachtheile berühmen könne.» Archiv cant. XIII 13. Departement federal da finanzas alla combra d'administraziun retica. Bern, ils 20 da zercladur 1802.

<sup>40</sup> «. . . das er ein Freund von landwirtschaftlichen Versuchen ist und sich Bücher und andere nöthige Hilfsmittel zu seinen Studien anschafft, wodurch ihm freylich manche Ausgaben veranlasst werden mögen, welche nach der Denkgungsart seiner Landsleute als unnüzz und verschwenderisch aufgesehen werden.»

combra buca enconuschent, che e daco el duessi ver piars la confidanza ed attaschadad da ses parochians.»<sup>41</sup> Il departement era «sufficientamein satisfatgs» da quest rapport e considerava ussa la caussa per liquidada. Sche Castelberg duess denton perseverar en sia «temelegadad» enviars Spescha, sche vegness Dolder a considerar quei sco «ina enzenna da persecuziun d'in spiritual endretg da pasta liberala». Ins dueigi dar ordras a Castelberg, che Spescha vegni mess en nundisturbau possess dil benefeci da Rumein en Lumnezia per veta duronta.»<sup>42</sup>

La combra d'administraziun ei aunc ina ga seviulta a Teodor de Castelberg, il qual ha mussau perschuadentamein, che Spescha, «malgrad tut sias excellentas qualitäts persunalas, hagi tuttina buca il dun d'in bien econom.»<sup>42a</sup> Sco raschun principala fa el valer, che P. Placi «prendi memia pauc risguard sin la pratica e selaschi menar da spir teorias ad experiments ed interpresas alla gronda, las qualas ein buc calculadas avunda e che disdeschan savens cun considerabel donn.»<sup>42b</sup> En scadin cass seigi la facultad da Rumein sut sia direcziun plitost vegnida sminuida che augmentada. Sco administratur vegni el pia buca en damonda.<sup>43</sup> Sin quei ei Dolder e Müller-Friedberg seretratgs aschi lunsch, ch'els han recumandau da surdar l'economia ad in auter pader dalla claustra u surdar ils beins da Rumein a P. Placi a tscheins.

---

<sup>41</sup> Ins sappi buca inculpar Spescha da schliata administraziun ni ch'el sfarlai: «da er ausser dem, was er auf seine landwirthschaftlichen Arbeiten und auf seine Studien verwendet, eine sehr einfache Lebensart führt. Auch wäre der kammer nicht bekannt, dass und warum er das Zutrauen und die Liebe seiner Pfarrgenossen entbehren sollte.»

Archiv cantonal Cuera, XIII. 13. Combra d'administraziun retica al departement da finanzas federal. Cuera, ils 29 da zercladur 1802

<sup>42</sup> Das Finanzdepartement war über diese Nachrichten «hinlänglich erbauet» und erachtete «die Bedenklichkeiten» Castelbergs als vollkommen aufgehoben. Wenn dieser aber bei seiner «Ängstlichkeit» betreff P. Placi beharren wollte, so würde Dolder dies «als ein Zeichen der Verfolgung des Klosters gegen diesen rechtschaffenen und liberal denkenden Geistlichen ansehen». Man sollte Castelberg den «bestimmten Befehl» zugehen lassen, dass P. Placi «in den lebenslänglichen und ungestörten Besitz des Beneficiums zu Romein im Lugnezertahl gesetzt sey.»

Archiv cantonal Cuera, XIII. 13. Departement da finanzas alla combra d'administraziun retica. Bern, ils 7 da fenadur 1802

<sup>42a</sup> «bey seinen vortrefflichen persönlichen Eigenschaften dennoch das Talent eines guten Wirthschafters nicht besitzt.»

<sup>42b</sup> «zu wenig Rücksicht auf das Praktische nimt und sich durch blosse Theorien zu Versuchen und Unternehmungen im Grossen verleiten lässt, welche nicht genug berechnet sind und daher öfters mit beträchtlichen Schaden misslingen.»

<sup>43</sup> Archiv cantonal Cuera XIII. 13. Combra d'administraziun retica al departement federal da finanzas. Sboz. Ils 20 da fenadur 1802.

Egl'emprems cass duei ins procurar ch'ei vegni buca ad animusadad encunter P. Placi, il qual seigi gie vegnius deportaus dalla partida austriaca ed ei savessi tgunsch nescher ordlunder in «odi da partida.»<sup>44</sup>

A caschun ch'ins ei secussegliaus a Trun, ils 13 da settember 1802, sur dallas relaziuns economicas dalla claustra, han ins in summa buca envidau Spescha.<sup>45</sup> Al capetel dils 19 d'october 1802 han ins prelegiu ina brev dil canoni Rudolf Duitg de Blumenthal, plevon a Pleiv (1781—1807), plena da lamentaschuns dils da Rumein encunter P. Placi.<sup>46</sup> Mo da l'otra vart recloma Spescha tier las autoritads a Cuera sur da midadas ella administraziun e selamenta, che siu entir muvel seigi vegnius «dislocaus». La combra d'administraziun a Cuera incarichescha Castelberg dad entras in auter ufficial «procurar per ina adattada economia dils beins claustrals a Rumein, denton senza ch'il pader vegni mulestaus e senza che siu dueivel susteniment vegni sminius.»<sup>47</sup>

Ella entira administraziun giugava in cert *mulin* ina impurtonta rolla. P. Placi veva cumprau quel a Luven per bia daners e schau transportar el a Rumein, nua che la glied levava buca schar endrizzar el. Ils da Rumein rapportan era, ch'il benefeciat hagi vuliu brattar entuorn plirs frusts. El seigi spir deivets ed adimplescha mo malamein siu uffeci ecclesiastic. Il capetel ha scumandau dad erreger perinaga il mulin.<sup>48</sup>

Malgrad tut era P. Placi da quei temps tuttavia buca ual aschi munglus. El vuleva era acquistar la beinvulientscha da ses confrars cun accentuar, che cun appellar alla regenza helvetica, hagi el vuliu proteger ils beins claustrals dad alienaziuns.<sup>49</sup> Ei para ch'el disponeva tuttina sur da daners, pertgei ils 3 da mars 1903 ha Anton Derungs a

---

<sup>44</sup> Archiv cantonal Cuera, XIII. 13. Departement federal da finanzas alla combra d'administraziun retica. Sboz. Bern, ils 27 da fenadur 1802

<sup>45</sup> AC I. 49

<sup>46</sup> AC I. 50 s.

<sup>47</sup> «für eine zweckmässige Verwaltung der Kloster-Oekonomie zu Romein zu sorgen, jedoch, so dass der Pater von jeder Plackerey und Schmälerung in Hinsicht seines anständigen Unterhalts gesichert sey.»

Archiv cantonal Cuera, XIII. 13. Combra d'administraziun retica a T. de Castelberg. Sboz. Ils 11 da november 1802

<sup>48</sup> AC I. 54 s.

<sup>49</sup> AC I. 55

Camuns declarau, che sia pretensiun a P. Placi pertuccond expensas dalla deportaziun ella summa dad 800 fl. seigi liquidada.<sup>50</sup>

Al capetel dils 12 da fenadur 1803 era P. Placi presents. Igl ei vegniu pretendiu rendaquen ton digl econom sco da tuts quels che occupavan exposituras.<sup>51</sup> Suenter che Spescha era s'absentaus, ha il capetel concludiu da *surdar l'administraziun da Rumein a P. Sigisbert Frisch*. L'auter di, ils 13 da fenadur, ha P. decan communicau quei en preschientscha da plirs confrars a P. Placi, e quei ha alterau quel talmein, ch'el ha immediat priu sia canna e capiala ed ei ius en prescha a Rumein, smanatschond ch'el vegni a far valer sias raschuns avon auters superiurs. Ils capitulars surstai han immediat termess suenter P. Martin Riedi per quietar P. Placi. La damaun dils 14 da fenadur ei P. Martin arrivaus a Rumein ed ha pudiu quietar empau igl irritau, principalmein cheutras, ch'el ha schau ad el las letgas da secolocar u a Trun u a Mustér ni era a Rumein, nua ch'el sappi passentar ina ruasseivla veta senza quitaus d'administraziun. Spescha ha consentiu ed ei restaus a Rumein.<sup>52</sup>

Ils 20 da fenadur ein ils P. decan e P. Anselm serendi a Rumein per inspectar ils quens. La rauba era secapescha buca augmentada, mo l'administraziun ei buca semussada aschi negligida sco ins carteva, ed ils deivets eran buca aschi gronds. Egl inventari figuravan 2000 fl. passivas, ch'eran buca mo d'attribuir a P. Placi sulet, mobein era als negligents antecessurs. Ils 24 da fenadur ei il niev administratur designaus dil capetel, P. Sigisbert Frisch, arrivaus a Rumein.<sup>53</sup>

Al capetel dils 17 da november ei P. Sigisbert Frisch selamentaus, ch'el sappi buca menar vinavon l'administraziun senza far novs deivets. Ei seigi «ina grevezia da mantener P. Placi, pervia da munconza da plaz en casa sco era pervia dalla peisa dils deivets.» Sin giavisch dils capitulars ha P. Sigisbert seschau muentar da restar a Rumein, ton pli ch'ins ha lubiu ad el da prender ad imprest 100 fl. per cumprar il necessari sch'ei fetschi basegns.<sup>54</sup>

Sut il squetsch dalla nunziatura a Lucerna sco era dil corpus catholicum eran ils paders da Mustér ussa promts da far ina fin cun

<sup>50</sup> Mappa P. Placi Spescha, Quitanza.

<sup>51</sup> AC I. 59

<sup>52</sup> AC I. 60

<sup>53</sup> AC I. 60

<sup>54</sup> AC I. 62 s.

la suprastonza claustrala provisorica, che consisteva enten P. Baseli Veith sco decan e da P. Anselm Huonder sco econom (statthalter), e dad *eleger in avat*. P. Placi cun aunc enzaconts paucs temevan snueivel la elecziun da P. Anselm Huonder cun siu energetic proceder, cul qual el mava buca bein d'accord e perquei ha el entschiet a far propaganda per il plevon da Pleiv, Rud. de Blumenthal, sco avat, ina proposta pauc monastica, che negin prendeva propi serius. Ils 13 de fevrer 1804 ha il convent lu elegiu P. Anselm Huonder sco niev avat. Ussa ha P. Placi accusau cun pliras brevs alla nunziatura igl auditor Cherubini, che veva presidiau l'elecziun, ch'el hagi impediù la postulaziun da Blumenthal. Da quellas lamentaschuns malfundadas han ins ton a Lucerna sco a Mustér fatg negina feda.<sup>55</sup>

Ins representass P. Placi tut falliu, sch'ins cartess, ch'el seigi adina staus malruasseivels e disgustaus a Rumein. Sia gronda lavur litterara entscheiva ual entuorn 1800. Tier las enconuschentas scartiras ston ussa era sias *canzuns per la messa* vegnir quintadas, avon maun egl archiv episcopal, mappa P. Spescha (nr. 100) cul tetel. «Kanzun sur ils Misteris de la sonca messa centada si gl on 1801 e squicada suenter la moda moderna de skriver. Squicau en la stampa de Joan Georg Berthold a Malans.» Ton la scartira sco ortografia tradescha P. Placi sco autur e sribent. Cuort suenter stat ei suenter Kanzun: «de Vijnoin» e medemamein suenter Berthold: «a Malans gl on 1802». Ei setracta tenor quei pia da cants, ch'ei in igl emprem vegni cantai a Vignogn 1801 e che duevan lu vegnir stampai 1802 a Malans. Che las canzuns ein igl emprem vegnidadas producidas a Vignogn, seresulteschan era ord la davosa strofa:

Vein bein kantau, niöss Diu hondrau  
 D'il temps de las sventiras,  
 Il Sakrament vein bein laudau,  
 Verdats mess en mesiras;  
 Sisi oss pia bien Vijnoin!  
 K äis staus nomnaus il liuk ded ojn;  
 Oss meina Dieus per tei il plojn,  
 E mojna en tiu von.

<sup>55</sup> Zeitschrift für Schweizerische Kirchengeschichte 59 (1965) 126—129

A questa strofa finala ha in maun dad empau pli tard agiuntau en lungatg tudestg: «Dieses Setzlein wird nur in 5 Exemplarien abgedruckt.» Medemamein stat sil feagl dil tetel cun il «de Vijnogn» da pli tard la cuorta remarca tudestga: «nur auf 5 Exemp.» Quei muossa clar e bein, ch'il stampadur veva da perpetnissar mo sin 5 Exemplars la derivonza da Vignogn. Il manuscret era pia arrivaus tochen tier il tschentader. Schebein el ei veramein vegnius stampaus, ei pli che mo dubius. Nus anflein tochen oz buc in exemplar. Lu ei era igl onn 1802 in indeci, pertgei Joh. Georg Berthold ha fatg schliatas fatschentas ed ei setratgs naven igl onn 1803.<sup>56</sup>) Las canzuns ein pia buca vegnidadas stampadas, muort difficultads finanzialas.

Pertucond il cuntegn dat P. Placi all'entschatta in «avis al lektur.» che pertucca sia atgna ortografia e lu suondan las strofas:

Introitus. 4 strofas: Avon tes peis kou seferin,

Gloria. 4 strofas: A ti, o Bap de tot il mun.

Evangelii. 3 strofas: O Diu, ti spiras in suspir.

Credo. 4 strofas: El Bap possent, k'ha nus skafiu.

Offertori. 3 strofas: L'onfrenda, ke nus kou portain.

Sanctus. 2 strofas: Enkont il Ciel lein nus klamar.

Elevaziun. 1 strofa: Pücont il pez krei jou zupau.

Suenter l'elevaziun 3 strofas: Quäi k'ai de paun e vin vejniu.

Agnus Dei. 4 strofas: Kurklaus äi kou il cot de Diu.

Benedicziun. 2 strofas: Denton ver Messa bein audiu.

Ina semiglionta ovra enten la repartiziun dallas canzuns sin las singulas parts dalla messa, mo differents enten il text, ei comparida a Cuera ella stampa Otto igl onn 1805 cun 12 paginas: *Spiritualas Canzuns de cantar sut la messa.*<sup>57</sup> La biblioteca romontscha da Mustér posseda duas ediziuns, ina da 12 (pia quella da 1805) e l'otra da 19 paginas.

Igl opus da Spescha ei pia pli vegls. Eis el in novum da sia specia? Cudischs da messa romontschs deva ei gia dapi il 17. tschentaner avunda, aschia da Gieli Demont (1670), da P. Carli Decurtins (1688

<sup>56</sup> Bündner Monatsblatt 1940 pg. 11, 20. J.A. von Sprecher, *Kulturgeschichte der Drei Bünde im 18. Jahrhundert*, ediziun Rud. Jenny, 1951, pg. 440

<sup>57</sup> *Bibliografia Retoromontscha* 1938 Nr. 503

resp. 1689) eav. Quels cuntenevan denton mo oraziuns per la messa, che ein sincronisadas cun la passiuin da Niessegner. Spescha setegn buca aschia vid la passiuin e porscha canzuns. Ei deva denton era da pli baul enneu gia cudischs da canzuns en Surselva, aschia da Balzer Alig (1674), da P. Zacharias da Salò (1685), da P. Carli Decurtins (1690) eav. Mo quels cuntegnan mo canzuns sin misteris da fiastas e sin sogns e buca sin parts dalla messa.<sup>58</sup> Aschia para P. Placi da ver cheu merets, cheutras ch'el ei entaus pli fetg alla acziun sacrala senza. Quei ei denton daventau plitost en sia fuorma anzi ductrinala e subjectiva, sco ins prefereva da gliez temps. Poesia ein las canzuns buc, essend ch'igl autur era in spert examinont e scrutont, e buc ina natira poetica.

### 3. *Da caplania tier caplania 1804—1809*

Suenter l'elecziun digl avat era P. Placi buca da tener pli a Rumein, ei plascheva buca ad el leu pli, sut la surviglonda da P. Sigisbert. Igl ei bein significont, ch'el ha schau dar dil plevon Blumenthal a Pleiv ils 19 da mars 1804 in attestat sur da sia administraziun duront treis onns a Rumein. Quei attestat ei zun favoreivels, cumpara Spescha cheu gie sco «exemplaric Spiritual» e sco bien econom ed administratur, il qual hagi leutier aunc applicau «tutta stenda e profund studi (sublime studium) per ils vegls documents ed ils privilegis dalla claustra exemta.»<sup>59</sup> A Sumvitg ei Spescha staus segiramein digl avrel tochen igl uost 1804 ed ha remplazzau per part plevon e caplon.<sup>60</sup>

Ils 13 da fenadur 1804 han ils paders enderschiu, che P. Placi hagi supplicau oralmein ed en scret la nunziatura entras siu frar Christian Luregn per la lubientscha da serender silmeins per entgin temps a Bergamo, essend ch'el seigi ius da Rumein a Sunvitg, nua ch'ei maunchi il necessari da viver. Ins veva numnadamein lubiu ad el dad ir a

<sup>58</sup> Comp. Iso Müller, Zur surselvischen Barockliteratur. Jahresbericht der historisch-antiquarischen Gesellschaft von Graubünden 81 (1951) 12—14, 27 s.

<sup>59</sup> Archiv claustral Mustér, originalias dalla Nuntiatura di Lucerna egl archivio Vaticano, copiau da P. Adalgott Schumacher. Fol. 402 pg. 7 s. als 19 da mars 1804

<sup>60</sup> sco remarca 59 Fol. 402, pag. 6 als 22 d'avrel 1804 e fol. 405 pag. 3 als 25 d'uost 1804

Sumvitg. Ins vesa, co Spescha saveva midar sia dimora senza grondas formalitads. Ils biars sche buca tuts ils paders prendevan per il meglier, da relaschar P. Placi per adina. En scadin cass dueigi siu viadi e sia dimora buca ir sin cuost dalla claustra. Plinavon dueigi el da tut temps saver vegnir revocaus, essend ch'el seglorieschi dad esser in obedeivel conventual.<sup>61</sup> Ditg e liung ei Spescha segenaus vidaneu, schebein el dueigi ir a Bergamo, nua che siu frar endridava el, ni sch'el dueigi surprendre la caplania da *Breil*, nua ch'ins veva dumandau el, ni sch'el dueigi surprendre il niev eregiu benefeci da *Rabius*. La finala ha el elegiu Rabius ed ha priu possess dalla caplania ils 17 da november 1804.<sup>62</sup>

Spescha veva surpriu Rabius senza ver priu contact cun la curia episcopala. Quella ha resentiu zun fetg quest proceder. P. Placi veva udiu quei dil capitani Lombris ed ha immediat scret ina brev d'exculpaziun cun biaras raschuns agl uestg Karl Rudolf Buol-Schauenstein (1794—1833). Ses superiurs ed ils vischins hagian surdau ad el quei post mo provisoricamein, ed el seigi cheu voluntariamein. Tenor las convenziuns cun la Cadi da 1643/48 seigi la claustra obligada da gidar ora ella pastoraziun dil contuorn, sche quei seigi necessari. Ultra da quei seigi il niev benefeci ni cumplets ni approbaus formalmein, el seigi tras beneficenza privata dils vischins instradaus. Spescha sedeclara promts da puspei returnar en claustra. Quella hagi tonaton da dar ad el annualmein 100 fl. per saver viver tenor siu stan. En vesta dalla actuala munconza da spirituals seigi atgnamein pli emperneivel da seretret en claustra che da prestar tonta lavur.<sup>63</sup> Sin questa brev dils 16 da december 1804 ha il cancelier episcopal J. J. Baal rispundiu cun brev dils 29 da december 1804, che scadin che vegli surprendre ina pastoraziun egl uestgiu, sappi far quei cun consentiment digl ordinariat. Ins vegni cheutier bein era a prender risguard sin specialas rela-

<sup>61</sup> AC I. 76 s. Plinavon sco remarca 59, fol. 405 pg. 1,4. Avat Anselm alla Nunziatura, ils 17 da zercladur ed ils 16 da settember 1804. El medem liug pg. 3, Spescha alla Nunziatura ils 25 d'uost 1804

<sup>62</sup> AC I. 84. Plinavon sco remarca 59, fol. 408, avat Anselm alla Nunziatura ils 14 d'october ed ils 18 da november 1804. A Rabius ha Spescha scret in fragment d'ina grammatica romontscha. Ils 2 d'avrel 1805. Spescha p.C.

<sup>63</sup> Archiv episcopal Cuera, mappa 100 (P. Pl. Spescha). Spescha agl uestg, Rabius, ils 16 da december 1804: «Bey gegenwärtigen Priestermangel bedarf mir kein grosser Stoss, dass ich mich zwischen den Klostermauern einschliesse. Ich erwarte nur einen Wink deroselben Willensmeinung, dann wird die Sache schon vollzogen und berichtet seyn.»

ziuns giudicialas denter claustra e Cadi. Tonaton ha la curia lubiu da surprender ad interim il «benefecium incompletum» da Rabius.<sup>64</sup> Dil reminent stueva la curia episcopala esser cuntenta che Spescha era leu, pertgei ual alla fin da quei onn 1804 ha il plevon da Sumvitg resignau e sinquei ha ei dau bravamein despetas, duront las qualas P. Placi ha gidau ora a Sumvitg. L'entschatta december 1805 ha Spescha, per ordra digl avat, bandunau Rabius, essend che la claustra leva buca sclauder quei post ad in spiritual diocesan.<sup>65</sup>

Ussa ha Spescha aunc surpriu il december 1805 la caplania en *Val S. Pieder*, nua ch'el ha finiu ils 5 da december 1806 la tiarza part da sia descripziun dalla Cadi.<sup>66</sup> Cheu eis el staus tochen sia scumiada a *Pleiv*, nua ch'el ha puspei surpriu la caplania. Igl ei segir ch'el era leu 1808, pertgei ils 16 d'avrel da quei onn ha el scret da *Pleiv* anora sia lamentaschun sur la suprastanza ecclesiastica da Val.<sup>67</sup> Il medem onn era Cristian Hansemann medemamein setratgs en quei center dalla val sco plevon (1808—1815). Alla biala entschatta han omisdus exprimiu il giavisch, da habitar en atgna habitaziun, denton da tener casa comunabel. Egl archiv claustral da Mustér sesanfla in florilegi (*Alvear*) latin-romontsch, pertenenent in contract d'in tener-casa comunabel denter il «plevaun niev de *Pleiv* Christian Hansemann et Segner Pader Placi, religius de Mustér e Caplon a *Pleiv*.» Sin pag. 65/66 suondan tenor sboz dil contract in «Inventari de Segnier Sur Plevaun», enten il qual tuttas provisiuns da cuschina e tschaler dil plevon ein nudadas.

La fin da quei onn 1808 ha Spescha puspei bandunau quei post, disgustaus dallas malemperneivladads, ch'ins veva caschunau ad el, sco el sez di. Ils 22 de december 1808 eis el arrivaus a Mustér, nua ch'el sperava da daventar successur da P. Gallus Soliva silla caplania da S. Antoni a *Caverdiras*. Quei ei reussiu. Ils 26 da schaner 1809 compara el sco caplon a *Caverdiras*. La «entschatta d'ina historia retica» (*Anfang einer rätischen Geschichte*) ha el scret e finiu cheu ils 11 d'avrel 1809.<sup>68</sup>

---

<sup>64</sup> Archiv episcopal Cuera mappa 100. J.J. Baal a Spescha. Cuera, ils 29 da december 1804

<sup>65</sup> AC I. 85—87, 94 s. Comp. Bündner Monatsblatt 1966 pg. 257 s.

<sup>66</sup> AC I. 95 e Spescha p. CI

<sup>67</sup> Spescha p. CII

<sup>68</sup> AC I. 112 e Spescha p. CII

#### 4. Caplon a Selva 1809—1812

Tujetsch cun ses cuolms ha per P. Placi adina giu ina certa attracziun. Igl onn 1805 ha el descret extendidamein questa val.<sup>69</sup> El enconuscheva denton era ils biars prighels, che smanatschavan als avdents cun lavinas, incendis e bovas. Aschia ha el encuretgi in plaz central e segir en tuts graus ed ha anflau quel denter Salins ed il Rhein, pia da vart mesa-notg dalla staziun da viafier a Sedrun. Cheu seigi il pli extendiu e bi plaz egl entir Tujetsch. «Sche jeu fuss il cumandant da Tujetsch, stuess vegnir baghegiu cheu in grond, general e beinconstructiu vitg sco in marcau.»<sup>70</sup> Ils da Zarcuns, Camischolas, Salins, Gonda e Sedrun vessan da baghegiar cheu lur casas e clavaus e quei en ina fuorma da rombus. A Sedrun restass mo pli la baselgia e la casa parvenda.<sup>71</sup> L'insinuaziun leutier ei vegnida ad el d'ordeifer: «Ins fetschi per senn, cons vitgs e marcaus el mund ein baghegiai aschi bein e regularmein! Tgi ha baghegiu els? Ils retgs ed imperaturs, prencis, signurs e purs? Na ils meisters, artists e mistergners, cun agid dils auters han baghegiu els.»<sup>72</sup> Enzatgei semigliont dueien era ils Tuatschins prestar.

Talas planisaziuns idealas razionalisticas da marcaus eran — senza plidar dad anteriuras periodas — cunzun dapi la renaissance en moda. Ins scuffeva projects en fuorma da rudials, poligons, steilas e quadrats. Il baroc prefereva fuormas sromadas sco Versailles e Karlsruhe. Il classicissem dil 18. tschent. ha continuau cun quei stil, sco per ex. il maletg dil marcau da Palmanova el Friaul ord la fin dil 18. tschentaner muossa, che sortescha dalla fuorma da steila. Quella epoca prefera il matematic ed il razional. Animaus da quei spert ha Spescha scaffiu sia visiun digl avegnir cul vitg tuatschin central en fuorma romboitica. Il proiect fantastic ofniescha denton era siu entusiassem per questa val alpina, suenter la quala el bramava gia suenter paucs

<sup>69</sup> Spescha 199—256

<sup>70</sup> «Wenn ich Befehlshaber von Tawätsch wäre, müsste hier ein allgemeines, regelmässiges und wohlgebautes Dorf gleich einer Stadt gebauet werden.»

<sup>71</sup> Manuscret digl archiv clustral Mustér, Pl. Sp. 5 pg. 293—312 tier igl onn 1805. Figura e per part text ediu en la periodica «Disentis» 17 (1950) 5—13

<sup>72</sup> «Sehe man, wie viel Dörfer und Städte in der Welt, unter welchen so viel regelmässig und schön gebauet sind! Wer hat sie gebaut? Die Kaiser, Könige, Fürsten, Herren und Bauern? Nein, die Baumeister, Künstler und Handwerker mit Hilfe der übrigen haben es gebauet.»

onns. Cheu duevan era ses plans generus vegnir realisai per Selva en fuorma practica e mudesta, veva quella caplania gie era plaschiu ad el.

La parvenda fundada gia 1666 ei il bia vegnida occupada da spirituals diocesans. Il davos ei stau Pieder Fidel Weller, leu dapli 1793 u 1795, che haveva surviviu la gronda disgrazia da lavina dils 13 da december 1808. El ha bandunau Selva la stad 1809 per surrender ina caplania a Wassen.<sup>73</sup> Ils vischins han schau ir bugen el, cun quei ch'els cartevan, ch'el seigi «buca ual nizeivels per la pastoraiziun» (er sei «für ihr Seelenheil dermahl nicht nützlich»)<sup>74</sup> Denton era ei grev da survegnir in spiritual per quei liug isolau e solitari. Per pli tgunsch arrivar agl intend han ils vischins da Selva e Tschamut augmentau la parvenda ils 23 d'october 1809 ord atgna iniziativa e sin giavisch digl ordinariat. Las intradas ein vegnidas migluradas ed ins ha empermess dad erreger pil caplon a Sutcrestas ina casa segira da lavinas. Era stueva el buca ir aschi savens a Sedrun ella parochiala. Buca meins che quater representants dils vischins han suttascrit il document: Stathalter Gion Gaudios Riedi, Gion Benedetg Candinas, Gion Antoni Schmet, Fidel Paul Wenzin. Il document ei vegnius approbaus digl ordinariat ils 12 da november 1809.<sup>75</sup>

Nuottatonmeins era ei grev dad anflar in caplon per Selva. Ins ha repetidamein mo adumbatten supplicau Weller da returnar a Selva.<sup>78</sup> En questa situaziun leva Spescha segidar. El ei sepurschius, mo buca senza consentiment de siu avat, ed ei vegnius elegius unanimamein ils 12 da november 1809 per diesch onns sco caplon da Selva. Spescha ha supplicau il plevon tuatschin Joseph Anton de Castelberg a Sumvitg dad interceder per el a Cuera. Matei ch'el leva buca haver difficultads sco a sias uras a Rabius. Sco raschun per sia decisiun ha Spescha allegau, el «seigi sfurzaus dalla necessitad e muentaus da misericordia» (victus necessitate et motus misericordia). Era ils vischins da Selva han rugau Castelberg dad intervegnir en quella caussa tier la

<sup>73</sup> B. Berther, Baselgias, capluttas e spiritualesser de Tujetsch, 1924, pg. 20—22, 46—47. Il medem, Selva avon 100 onns, 1909 pg. 7. Spescha 431—434

<sup>74</sup> Archiv episcopal Cuera, mappa 100. Gion Ev. Riedi al cancelier Baal. Rueras, ils 30 da november 1809

<sup>75</sup> Archiv episcopal Cuera, mappa Tujetsch, Beneficium Selva, act dils 23 d'october 1809. Berther, Selva avon 100 onns pg. 35

<sup>76</sup> Archiv episcopal mappa 100. Gion Evangelist Riedi al cancelier Baal. Rueras, ils 18 da november 1809 ed ils 30 da nov. 1809

curia episcopala. Tras ina brev privata ed ina officiala ha Castelberg supplicau il cancelier episcopal da confirmar Spescha. Ed essend ch'ils vischins seigien paupers e basignus, vegni ins relaschar las taxas ordinarias da confirmaziun.<sup>77</sup>

A Cuera eran ins empau surstaus ed ha schau spetgar. En quei interval ei Weller compariu a Selva ed ha protestau encunter l'elecziun da Spescha, mo ei puspei returnaus a Wassen. Ussa ha Spescha fatg ina cunterattacca. La dumengia dils 27 da november 1809 ha el beinmarvegl bandunau Caverdiras, senza avisar la gliעד da leu, ei serendus a Selva, ha fatg leu il survetscha divin ed ei semussaus leu fetg amicabels e beinvulents enviers scadin, da maniera ch'ils vischins han termess in delegau tier sur Castelberg a Sumvitg, per che quel gidi Spescha tier sia elecziun. La curia episcopala hagi gie senza pretendiu, ch'ella approbeschi scadin che vegni elegius. Cul representant da Selva ei era P. Placi sez serendus tier sur Castelberg. Quel ha immediat viu, che Spescha era buca da surplidar da seretrer da bunaveglia, mobein ch'el era ferm decidius dad ir a Selva. Mo leva el aunc la approbaziun episcopala.<sup>78</sup>

En favur dils dus vitgets ha era il caplon da Rueras, Gion Ev. Riedi, intervegniu tier la curia episcopala. Ei seigi ner temps da gidar. «La gliעד san prest buca vegnir tier mei a messa pervia dalla nevada. La giuventetgna resta senza scola e ductrina.» Malsaus sappien murir senza sacraments.<sup>79</sup> Sin la supplica dils da Selva ha era il plevon da Sedrun, sur Luregn Schmedt, scret a Cuera, per contonscher l'admissiun da Spescha.<sup>80</sup> Sin il votum d'in da Selva ei P. Placi sez seviults per scret da Caverdiras anora alla curia. El mondi ord compassiun a Selva e temi negin prighel, sch'ei setracti dil salit dallas olmas. Igl avat detti siu consentiment, sche la curia lubeschi per diesch onns. Essend che la neiv seigi gia lunsch giadora, seigi la causa buca da trer alla liunga.<sup>81</sup>

<sup>77</sup> Archiv episc. mappa 100. Plevon Giusep Antoni de Castelberg al cancelier Baal. Sumvitg, ils 12 da november 1809. Sur da Castelberg mira Erwin Poeschel. Die Familie von Castelberg, 1959, pg. 492, 524

<sup>78</sup> Archiv episcopal, mappa 100. Plevon Giusep Antoni de Castelberg al cancelier Baal. Sumvitg, ils 3 da december 1809

<sup>79</sup> l.c. Caplon Gion Ev. Riedi al cancelier Baal. Rueras, ils 30 da november 1809

<sup>80</sup> l.c. Plevon Laurentius Schmedt al canc. Baal. Sedrun, ils 30 da november 1809

<sup>81</sup> l.c. P. Placi Spescha al canc. Baal. Caverdiras, igl 1. da december 1809

Denton veva Weller tuttina desistiu definitiv sil benefeci selvan. Sin quei han ils dus vischinadis elegiu Spescha atgnamein per la tiarza ga. Era il plevon da Tujetsch, L. Schmed, che purtava la finala era per Selva la responsablada, ha aunc inaga intervegniu per P. Placi.<sup>82</sup> Effectivamein eran ins gia ils 5 da december decidius da confirmar el per in trienni, mo buca per pli ditg.<sup>83</sup> La brev sezza, cun la quala il cancelier episcopal communicescha quei a Spescha, datescha denton per dils 19 da december 1809.<sup>84</sup>

Ils 22 da december 1809 ha P. Placi bandunau Caverdiras, schegie ch'el ha survegniu l'approbaziun da Cuera per suenter. El ha celebrau ils misteris da Nadal en siu niev liug da pastoraziun. Mo quei ch'el vess strusch cartiu ei daventau: Per il di da s. Silvester han lavinas da pliras varts periclitau e donnegiau il vitg da Selva. Entuorn miezdi, suenter il survetsch divin, era il prighel fetg gronds. «Tut che spitgava quei mument sco il davos dalla veta. Ussa sai jeu tgei sentiments ch'ins ha, cura ch'ins stat el cenit dalla veta e dalla mort.» Perfin P. Placi, ch'era segirs e veva negina tema, ha entschiet a tremblar ils mauns. El ei ius naven cun umens da Tschamut e saveva ussa, tgei prigus liug ch'el veva surpriu.<sup>85</sup>

Circa dus meins pli tard ei nies beneficiat seviults directamein agl uestg Carl Rudolf Buol-Schauenstein, per recumandar il disgraziu vitg. Igl onn 1786 (recte 1785, 15 oct.) seigi il vitg barschus dil taliter. 1806 hagi ina lavina sfraccu en in clavau denter la baselgia e casa parvenda, 1808 hagi la lavina destruiu tuts ils clavaus da fein deno in e satrau sut la neiv 25 persunas e varga 100 animals da casa, e la finala hagi el sez viu quest onn, co las lavinas ein sederschidas da dretg e seniester sur il vitg. Ina casa, cun duas famiglias che durmevan, e dus clavaus seigien vegni scuai naven. Tuts quels eveniments «sforzan intelletg e cunscienza» da transportar il vitg al segir Sutcrestas e quei seigi ton pli giavischeivel che quei liug seigi pli maneivel a Tschamutt, che audi pastoralmein leutier. Gia plevon Castelberg seigi

<sup>82</sup> l.c. Plevon L. Schmedt al canc. Baal. Sedrun, ils 8 da december 1809

<sup>83</sup> l.c. Concept dil cancelier Baal, ils 5 da december 1809

<sup>84</sup> l.c. Cancelier Baal a P. Placi Spescha. Cuera, ils 19 da december 1809

<sup>85</sup> Archiv episc. mappa claustra Mustér. P. Placi Spescha al cancelier Baal. Selva, ils 2 da schaner 1810. Questa brev ei edida en Spescha pg. 436 s., mo senza l'introducziun. Comp. Berther, Selva avon 100 onns, pg. 36. Il rapport da AC I. 122 raquenta dil discletg dils 13/14. da december 1808, sco ei para.

secunvegnius cun la curia e cun ils vischins, da baghegiar leu ina casa parvenda cun caplutta lien. Essend che la gliעד seigien fetg paupra sappi ella buca far quei. Perquei ha Spescha supplicau igl uestg per la lubientscha e recummendaziun dad interprendre ina collecta tier il spiritualesser dalla diocesa per quest intend.<sup>86</sup>

Spescha ha ussa mess tut en moviment per transportar igl entir vitg da Selva cun la baselgia a Sutcrestas. Perquei ha el scret brevs sin tuttas varts dil firmament. Denter auter eis el seviults ils 13 d'ust 1810 a Pieder Antoni de Latour e cheutras alla regenza cantunala. En quella brev paleisa el, ch'el hagi l'intenziun da prender siu refugi «tier il grond donatur dalla Frontscha, che spenda onn per onn tons milliuns per basegns spirituals en tut il mund.» Cheutier drovi el ina «commuentonta recummendaziun» (ein rührendes Empfehlungsschreiben).<sup>87</sup> Ina brev a *Napoleon* stueva vegnir bein ponderada. Perquei ha la regenza cantunala dumandau igl εμπrem la vischnaunca da Tujetsch la qualla ha immediat rispundiu, che las indicaziuns da Spescha corrispundien alla verdad. Selva stoppi vegnir translocous. Essend ch'ils mieds leutier ein buca da contonscher en Svizra muort las biaras tribulaziuns e l'uiara, sche stuein nus concluder cun P. Placi, ch'igl agid da Selva seigi dad encurir egl exteriur (so müssen wir somit mit dem Herrn P. Placi folgern, die Beihilfe Sälvens sey im Ausland zu suchen).<sup>88</sup> Pli tard ha Spescha bein era scret pil medem basegns al prenci-primas dalla Germania *Karl Theodor von Dalbert*, in protegiu da Napoleon, che residiava lu a Regensburg, sco era a *dr. Johann Gottfried Ebel* a Turitg.<sup>89</sup> Tgei ch'ei daventau ord tut quellus brevs a Cuera, Turitg, Regensburg ed a Paris, savein nus buc.

Segiramein vuleva igl uestg lubir e recummandar ina collecta egl uestgiu. Sin quei ha la vischnaunca da Tujetsch empermess da contribuir gratuitamein la lenna per la casa parvenda e per la caplutta e schiglioc da dar tut pusseivel agid. Sin il votum dils vischinadis ha Spescha proiectau ils *plans* per fontaunas, aquaducts, vias ed orts eav.

---

<sup>86</sup> Archiv episc. mappa claustra Mustér. P. Placi Spescha agl uestg. Selva, ils 27 da fevver 1810

<sup>87</sup> Spescha a Peter Anton de Latour, Selva, ils 13 d'ust 1810. Brev edida en Spescha pg. 437—438

<sup>88</sup> Vischnaunca da Tujetsch a P. Ant. de Latour. Sedrun, ils 16 d'ust 1810. Brev edida en Spescha 438 s. Sur da P. Placi e sia admiraziun da Napoleon mira Bündner Monatsblatt 1963 pg. 122—124

<sup>89</sup> Spescha 308, 438. Igl 1. da settember 1810

La direcziun dallas lavurs vuleva el mo lu surpender, sche quater umens seigien leutier gideivels ed il plevon da Tujetsch surpendi da menar ils quens dad intradas ed expensas. Per collectar quintava el tschun onns, essend ch'el sappi esser absents mo la stad ed igl atun. La direcziun dil baghegiar sappi el confidar a negin e sin ils mistergners sappi ins buca sefidar. Nies caplon era propi fascinaus da siu futur vitg. El selegrava siper il cancelier episcopal da sia nova casa caplania, beinsituada e sauna, propi in post per in spiritual ed ina baselgia, «che tili l'admiraziun digl entir mund ed il plascher digl entir clerus a sesez» (der die Bewunderung der Welt und das Vergnügen der gesamten Geistlichkeit auf sich ziehen wird). Leutier quintava el cun in daguot (mit einem Tropfen) ord il scazzi napoleonic, cun la vendita da siu cabinet da naturalias, che vegni quella uisa preciaus pauc da ses confrars (das von meinem Mitbrüdern wenig geachtet wird) e «plinavon cul recav ord sia atgna possessiun privata. Jeu sperel e sperond vegn jeu speranza consolaus.» (Ich hoffe und hoffend werde ich hoffentlich getröst).<sup>90</sup>

Sco gia la remarca sur dalla alienaziun da sia collecziun e da sia rauba tradescha, supprimeva il niev pensum empau sia vocaziun monastica. Occupaus febrilmein cun sia ovra caritativ-soziala eis el sere-solvius dad *extrar dalla claustra* ed ir tiel clerus diocesan. Agl uestg Carl Rudolf indichescha el ils 25 d'uost 1810 suondontas raschuns: «Las persecuziuns, sut il buordi dallas qualas jeu hai suspirau plirs onns, la premura per las olmas, che ha inflamau mei schi savens, la moderaziun ed occupaziun pil beinstar da mes concarstgauns, alla quala jeu sun da giuven ensi vegnius disaus.» Finalmein spera el sin la «buontad cordiala e migeivladad» digl uestg.<sup>91</sup> Pli detagliadamein declara el il motiv dallas persecuziuns, cun menziunar las travaglias digl exil, e quei hagi igl avat Laurentius Cathomen († 1801) era viu en. Plinavon alleghescha el, ch'il convent vulevi secularisar el igl onn 1802, per cass ch'el giavischassi quei. Finalmein vegni el persequitaus, perquei ch'el seigi serendus igl onn vargau a Selva. Igl avat Anselm hagi dau ad el il consentiment ils 23 d'uost 1810, pia avon paucs dis,

<sup>90</sup> Archiv episc. mappa 100. Spescha al cancelier Baal. Selva, ils 14 d'uost 1810

<sup>91</sup> «Die Verfolgungen, unter welcher Bürde ich mehrere Jahre hindurch seüfzete, der Seeleneifer, der mich so oft anflammete, die Mässigung und Beschäftigung für das Wohl meiner Mitmenschen, zu dem ich von Jugend auf angewöhnt ward.»

mo hagi remarcau, ch'el vesessi pli bugen sch'el massi en ina outra claustra. «Mo essend ch'jeu anflel negina claustra adattada per mei, e cun quei che jeu observel la gronda digren dil clerus secular en mia patria, elegel jeu il stan sacerdotai en mia patria.» P. Placi aggiunsha aunc al tema: Duess la claustra vegnir sliada, il qual ei da temer, sche sperel jeu, sco um da 55 onns, che ha surviu alla claustra spargusamein e nizeivlamein, da survegnir ina pensiun: Duess ella denton exister vinavon, sco jeu giavischel da cor, vegnel jeu, sch'ei vegn pretendiu, era a presentar in sufficient patrimonium.»<sup>92</sup>

Sco perdetga e garant designescha Spescha il plevon da Medel, sur Gion Antoni Gieriet da Tujetsch, secretari dil capitel dalla Cadi, al qual el hagi surdau ses attestats. Quel dueigi buca mo descriver sias qualificaziuns e sia conduita, mobein era sias «mendas ed insufficienzas» (Untugenden und Unfähigkeiten), pertgei el vegli buca comparer dadoravi sco pastur e dadens sco luv.<sup>93</sup> Gieriet ha scret ina brev da recumandaziun, tenuta en tiarms generals, en la quala el accentuescha las grevas tribulaziuns dallas persecuziuns, l'ardenta premura per las olmas (zelotissimus) da P. Placi.<sup>94</sup> Gia suenter strusch duas jamnas ha igl uestg da Cuera schau rispunder tras il cancelier, ch'el hagi negin motiv da semischedar ella caussa, e P. Placi hagi ses superiors canonics, ils quals dueigien sez s'empatschar dad el (qui provideant).<sup>95</sup>

---

<sup>92</sup> «Da ich aber kein für mich anpassendes Kloster vor mir habe, dahin ich gehen kann, da das Bestehen der Klöster nur in einer unsicheren Hoffnung beruhet, und da ich in meinem Vaterland den grossen Abgang der Prieserschaft bemerke, erwähle ich den Priesterstand in meinem Vaterland . . . Sollte das Kloster aufgehoben werden, welches zu befürchten ist, so hoffe ich als ein Mann von 55 Jahren, der dem Kloster sparsam und nuzlich gedient hat, eine Pension zu erhalten; wenn es aber bestehen sollte, welches ich von Herzen wünsche, werde ich, wenn es verlangt wird, auch ein hinlängliches Patrimonium stellen.»

Il prighel che la claustra savessi vegnir sliada, era lu tuttavia da temer. Revoluziun e secularisaziun eran da manivel. A Cuera ei la claustra da S. Leci vegnida sliada 1801 resp. 1806 ed ils redemptorists ein vegni scatschai da leu 1807. Cun S. Leci ei era la claustra da Churwalden curdada. La claustra da Schänis ei suondada 1811. Igl uorden dils caputschins ei vegnius sliadius tras decret da Napoleon 1810 ella Italia. Per quei han els era desistiu dalla pastoraziun a Sur 1811. Comp. Bündner Monatsblatt 1966, pg. 259 s.

<sup>93</sup> Archiv episcopal, mappa claustrala Mustér. Spescha alg uestg. Selva, ils 25 d'uost 1810. Spescha spiculava aunc la primavera 1811 sin la caplania da Breil, nua ch'ins veva elegiu el per quater onns. PlSp 48. Spescha a Pieder Ant. de Latour, ils 16 ed ils 30 de mars 1811.

<sup>94</sup> Archiv episcopal, mappa claustra Mustér. Plevon Gion Ant. Gieriet agl uestg, ils 30 d'uost 1810

<sup>95</sup> l.c. Cancelier Baal al plevon Gieriet, ils 11 da settember 1810

La risposta negativa digl uestg ha bein tuccau fetg. In auter vess forsa detg, ussa vegli el per daditschiert semussar sco exemplaric spiritual e pastur dallas olmas, per demussar agl uestg igl entiert. Mo quei, che nus udin da P. Placi gia il proxim onn, lai plitost concluder, ch'el eri decidius dad ussa naven sededicar a sias atgnas ideas e dad ir sias atgnas vias, vegli ins lu tertgar dad el tgei ch'ins vegli. Igl atun 1811 rapporta plevon Castelberg da Sumvitg, che veva gidau Spescha a Selva, ina entira litanìa da raproschas *ed inculpaziuns dil pievel* encunter el. Aschi vegli el buca pli, che la glièud salidien cun «ludaus sei Jesus Cristus», essend che Dieus seigi per sesez gia ludaus avunda. Enstagl dueigien ins dir «bien di» u «buna sera». El lubeschi era buca da recitar dad ault il rusari duront la messa e da dir ils tschun paternos e salidades alla fin dil survetsch divin. Il rusari quotidian prezegi el schi pauc, ch'el laschi gnanc tucclar leutier, aschia che Selva tralaschi quella devoziun. Era lubeschi el buca la recitaziun della devoziun mariana (corona mariana), usitada la sonda. Il diever dalla aua benedida sgavegi el buc, mo recamondi era buca el. Sur Castelberg accentuescha: «Quei secuntener irreligijs da P. Placi croda en egl agl um cumin.»

Spescha hagi plinavon, aschia continuescha il plevon da Sumvitg, era gizau sia plema encunter la disciplina ecclesiastica. Sut in pseudonim hagi el scret in *cudisch encunter il celibat*, cul tetel «Der Wilde Mann.» Il manuscret hagi el tarmess ils 30 da mars digl onn current 1811 a Benedikt Braun a Cuera, per schar gidar el tras quel enzanua alla stampa.<sup>96</sup> Braun seigi secussegliaus surlunder cul stampadur e publicist Bernard Otto († 1816), il qual seigi sco amitg dils franzos era vegnius exiliaus 1799 ad Innsbruck.<sup>97</sup> Il scrutatur dalla natira, Karl Ulysses von Salis/Marschlins († 1818), hagi era la detta el giug e vegni a surprender ina part dils cuosts da stampa.<sup>98</sup> Igl avat Anselm ha encuret g da survegnir l'ovra da Spescha en ses mauns, mo adumbatten. P. Placi fetschi ora las tschontschas, ch'el seigi ius voluntariamein a Cuera per defender sia ovra e quei sin insinuaziun dil plevon da Breil, dr. theol. Gion Battista Derungs, tenor ordras dalla

<sup>96</sup> La famiglia grischuna Braun ha giugau gia dalla reformaziun ina impurtonta rolla a Cuera. M. Valer, *Geschichte des Churer Stadtrates*, 1922 pg. 70 s.

<sup>97</sup> Sur da Bernhard Otto mira *Bündner Monatsblatt* 1940 pg. 1—12 e *Sprecher/Jenny*, *Kulturgeschichte der Drei Bünde im 18. Jh.* 1951 pg. 437

<sup>98</sup> Sur da Salis/Marschlins mira *Sprecher/Jenny* pg. 416—418, 663

curia. Mo igl uestg hagi gnanc ritschiert el e perfin il cancelier hagi saviu entscheiver nuot cun el.<sup>99</sup> Baal saveva denton nuot da quest pretendiu monitum e rapporta, ch'igl uestg eri da lezzas uras fitschentaus fetg cun urgenta corrispondenza ed hagi cartiu, ch'ei setracti mo d'ina viseta da creanza ed hagi perquei schau dir a P. Placi, che quei dueigi valer per la viseta sezza.<sup>100</sup>

Igl ei forsa bien da remarcar gia ussa, ch'ins hagi buc enconuschiu l'entira situaziun endretg, ni a Mustér en claustra ni el casti episcopal a Cuera, aschilunsch sco ei settractava da duas diversas scartiras. Sur-lunder essan nus orientai meglier entras indicaziuns da P. Placi ord ils onns 1818 (PlSp 30 b pg. 146—149) e 1820 (Brev da Spescha a decan Steinhauser). Tenor quellas ha Spescha bein scret in tractat cul tetel «Wiederrechtliche Einführung des Cölibats in der abendländischen Kirche», mo pér in da ses amitgs, forsa il plevon Hansemann a Pleiv, che ha legiu quei tractat, ha lu componiu el senn da quel lezza ovretta cul tetel «Der wilde Mann in den Alpen.» (Comp. Spescha p. XXII) Mo era aschia compareva P. Placi sco il ver autur dalla entira sensaziun.

Aschia era ei strusch da sesmarvegliar, ch'il cancelier Baal ei selamentaustaus siper igl avat Anselm Huonder sur digl entir secuntener da Spescha. Ei settracti gie da devoziuns lubidas ed approbadas dalla Baselgia, che pader Placi discrediteschi. En tals cass stuessien ins era intervegnir tier spirituals diocesans.<sup>101</sup> Sin quei ha igl avat Huonder termess P. Placi, gia per la secunda ga, il november 1811, tier igl avat-visitatur da Nossadunnaun, per, entras l'autoridad da quel, «migliurar siu patertgar e medegar el da sia furia encunter il celibat e da siu libertinissem cuntrari a tutta disciplina ecclesiastica e claustrala.»<sup>102</sup>

---

<sup>99</sup> Archiv episcopal mappa 100. Plevon Jos. Ant. de Castelberg alla curia episcopala. Sumvitg, ils 13 d'october 1811. El medem liug, Avat Anselm Huonder a cancelier Baal, ils 5 da fenadur 1812, tenor la quala brev igl avat Huonder: «durch einen Priester eine Art von Monitorium mündlich zugehen liess». Siquai ei P. Placi serendus a Cuera, mo igl uestg hagi: «ihn nicht einmahl vorkommen lassen».

<sup>100</sup> Archiv episcopal, mappa 100. Cancelier Baal agl avat Anselm, ils 7 da fenadur 1812

<sup>101</sup> l.c. Cancelier Baal agl avat Huonder. Sboz. Ils 29 d'october 1811

<sup>102</sup> ... um ihn «auf bessere Gesinnungen zu bringen und ihn von der Abstehung seiner tobenden Wuth wieder das Coelibat und Freydenkerey, wieder Kirch- und Klosterzucht zu heilen».

Las lamentaschuns sezzas ha P. Placi era survegniu en scret digl avat, aunc avon Nadal 1811 <sup>103</sup> Da Buania 1812 ha Spescha communicau sin quei al cancelier episcopal, sia defensiun suondi pli tard, «schi prest sco l'aura semida». Mirond anavos manegia el: «Gia dapli dus onns battel jeu cun sgarscheivels elements e cun glied selvadia ed il resultat ordlunder ei ignorar il bien. Cura ch'ins vul pigliar cavals selvadis e far dumiaschels els, smanatschan els da morder e trer davos ora, e sch'ins vul encurir glied selvadia e menar ella tier Diu, sch'ei ins en prighel da vegnir scredataus e calumniaus dad ella.»<sup>104</sup> Ual bein pon questas expressiuns buca ver tunau ellas ureglias dils da Selva. Tut auter scriva ussa Spescha, che cura ch'el encureva per tut prezi il benefeci da Selva! In meins pli tard communichescha el a Cuera, ch'el hagi surdau sia defensiun per scret agl avat e che tuttas lamentaschuns seigien semussadas sco nunveras tras perdetgas da siu liug da domicil. Las tgisas seigien «lu dil tut inventadas e strubigiadas.» Il denunziant hagi agiu diametral encunter la carezia cristiana e seigi in ver calumniader. En moda quasi baroca suttascriba el sco «promptissim devotissim survient ed amitg.»<sup>105</sup>

Ord tut quei vesan ins, che sia posiziun el vitget muntagnard era buca propi emperneivla. Aschia surstat ins strusch, sche Spescha communichescha gia ils 15 da matg 1812 al cancelier Baal, ch'el hagi resignau alla caplania. Tonaton anfla el per bien dad engraziar, veva el la finala gudiu il benefeci dus onns e miez, il qual el veva caracterisau sco «unius cun bia prichels e grevezias» P. Placi ha gia saviu

---

Archivalias pertuccont Mustér el schinumnuu archiv dalla congregaziun a Nosadunnaun, ASF (32) 6. Avat Anselm agl avat Konrad Tanner, ils 28 d'uost 1818. Questa fontauna ei da cheu naven scursanida sin A SF. Plinavon AC I. 143 november 1811

<sup>103</sup> Archiv episcopal mappa 100. Avat Anselm al cancelier Baal. Mustér, ils 5 da fenadur 1812. Cheutier remarca suondonta.

<sup>104</sup> «Schon über zwei Jahre kämpfe ich mit schrecklichen Elementen und verwildeten Menschen und das Resultat davon ist Unkenntnis der Gutthaten. Wenn man verwildete Pferde fangen und bezäumen will, wird man mit Rückschlägen und Bissen gedroht, und wenn man verwildeten Menschen aufsuchen und zu Gott führen will, läuft man Gefahr, von ihnen verschreit und verleimdet zu werden». Archiv episcopal, mappa claustra Mustér. P. Pl. Spescha al cancelier Baal. Selva, ils 6 da schaner 1812

<sup>105</sup> Die Anschuldigungen seien «entweder glatthin erdichtet oder schief ausgelegt.» ... dass «der Denunziant schnurgrad wieder die christlichen Liebe gehandelt und ein wahrer Kalumniant sey...» «bereitwilligster, unterthänigster Diener und Freund».

Archiv episcopal, mappa 100. P. Pl. Spescha al cancelier Baal. Selva, ils 4 da fevrer 1812

annunziar l'elecziun da siu successur ella persuna da Pieder Weller, che veva bandunau Selva ils 14 da fenadur 1809 per sorprender ina caplania a Wassen. Cura ch'el tuorni, vegni el ad anflar la casa parvenda vita.<sup>106</sup>

### 5. Caplon a Sedrun 1812—1814

P. Placi ha viu a vegnend la fin da sia activitad a Selva gia duront ils 1811 ed encureva ditg avon sia resignaziun in niev post. El veva denton el senn da restar ella Val Tujetsch e da mirar da survegnir la caplania a Sedrun, el center dalla val. Cheu ha ei dau ina gronda midada igl onn 1810. Il plevon Gion Luregn Schmid ei setratgs naven ed ha surpriu la caplania da Segnes e Giusep Hitz ei suondaus el a Sedrun sco plevon. Il medem temps ha il caplon Vigeli Wenzin bandunau Sedrun per sorprender la caplania da Rueras. Siu post a Sedrun ei restaus perinaga vacants.<sup>107</sup>

Carteivel veva P. Placi fiers sia egliada gia ditg avon sin la caplania da Sedrun e schau dar si davon dalla glied. Perquei ha el dumandau igl ordinariat a Cuera gia avon sia resignaziun a Selva, schebein ins lessi surdar ad el quei post, silmeins provisoricamein. Cancelier Baal ha sut ils 4 da matg 1812 immediat scret agl avat, sch'el seigi cuntents da quei, per silmeins ad interim, pertgei el sappi buca disponer senza auter sur dad in religius.<sup>108</sup> Schebein la brev ei propi vegnida termessa e rispundida ei a nus buca enconuschent. En mintga cass ei P. Placi vegnius elegius dalla pleiv, ils 14 da zercladur 1812, «unanimamein» sco caplon, sut la condiziun dalla approbaziun digl ordinariat e digl avat. Plevon Hitz ei vegnius incaricaus da dumandar igl ordinariat per l'approbaziun. El motivescha che la pleiv da Tujetsch hagi gia pitu bia dapli la partenza da sur Vigeli Wenzin, cunzun pertuccond la «ductrina ed autras cummadeivladads el survetsch divin.»<sup>109</sup> Cancelier Baal ha dumandau ils 30 da zercladur igl avat,

<sup>106</sup> Archiv episcopal, mappa claustra Mustér. P. Pl. Spescha al cancelier Baal, Selva, ils 15 da matg 1812

<sup>107</sup> J. J. Simonet, Die katholischen Weltgeistlichen Graubündens, 1920, pg. 174—176

<sup>108</sup> Archiv episcopal, mappa 100. Cancelier Baal agl avat Anselm, Sboz. Ils 4 da matg 1812

<sup>109</sup> l.c. Plevon Giusep Hitz al cancelier Baal. Sedrun, ils 21 da zercladur 1812

sch'el seigi cuntents.<sup>110</sup> Quei demuossa, che Spescha hagi buca vuliu far quella midada e tschentar avon fatgs a ses superiurs, senza consentiment da quels. Igl avat Anselm ha surschau la caussa entiramein agl ordinariat, «sina quei ch'ei hagi buca num, che jeu hagi consentiu u snegau la confirmaziun.» Mo vess el giu pli bugen, sche Spescha füss returnaus en sia claustra u ius en ina outra. Sur da quei veva el era giu corrispondenza cugl avat-visitatur da Nossadunnaun. El stoppi ir en claustra, sch'el vegni buca confirmaus sco caplon. Vegnessi el denton acceptaus, «stuess jeu scumandar ulteriurs recuors tier mei encunter P. Placi». Quei vul bein dir: Lu füss mo pli igl uestg, buca igl avat competents!<sup>111</sup>

Il cancelier episcopal ha bein capiu il tenor dalla brev dil prenci-avat. Igl uestg leva gia suenter l'elecziun digl avat Anselm Huonder 1804 metter la claustra pli fetg sut sia pussonza, dil qual avat Anselm ei serescudius mordio.<sup>112</sup> Aschia ha Baal anflau pli prudent, da risponder agl avat, el hagi ni vuliu interpretar en quella damonda dalla caplania enzatgei ni vuliu compromitar igl avat ella Val Tujetsch. Igl ordinariat sappi buca consentir alla elecziun da Spescha. Suenter che quel hagi resignau sin Selva, dueigi el ir leu, «nua che sia clamada cloma el.»<sup>113</sup> En quei senn ha Baal era scret a P. Placi: Ei vegni allegau grevas raschuns encunter sia elecziun. El dueigi serettrer voluntariamein dalla caplania da Sedrun, el sappi gie returnar en sia claustra, ni nua ch'el vegni clamaus. Quei mondi tier nuot agl ordinariat. Il plevon da Tujetsch ha il cancelier medemamein informau ed admoniu el da mirar per in auter caplon, el vegni segir a ver success.<sup>114</sup>

Aunc avon che P. Placi era en possess dalla decisiun negativa, era el setratgs cun siu tener-casa a Sedrun. Essend ch'el astgava aunc buca habitar en casa caplania, era el secasaus en ina casa privata e celebra-va la s. messa ella baselgia parochiala.<sup>115</sup> Per la fiasta da S. Placi, ils 11 da fenadur, eis el, sco sulet conventual da Mustér, restaus absents,

<sup>110</sup> l.c. Cancelier Baal agl avat Huonder. Sboz. Ils 30 da zercladur 1812

<sup>111</sup> l.c. Avat Anselm al cancelier Baal. Mustér, ils 5 da fenadur 1812

<sup>112</sup> Bündner Monatsblatt 1966, pg. 235 s.

<sup>113</sup> Archiv episcopal, mappa 100. Cancelier Baal agl avat Anselm. Sboz. Ils 7 da fenadur 1812

<sup>114</sup> l.c. Cancelier Baal a P. Placi Spescha resp. a plevon Hitz. Sboz. Ils 7 da fenadur 1812

<sup>115</sup> l.c. Plevon Jos. Ant. de Castelberg a cancelier Baal, ils 19 da fenadur 1812

a Sedrun, per grond smarvegl da ses confrars.<sup>116</sup> Plevon Hitz era en perfetg ed ha fatg scriver il plevon da Sumvitg Giusep Ant. de Castelberg alla curia, ch'ella dueigi sut quellas circumstanzias prender quellas mesiras ch'ella anfli per bien.<sup>117</sup>

La curia stueva ussa insister per daditschiert sin sia decisiun. «Il fatg, ch'el ha gia transportau sias mobillas, sa buca esser sufficientes per igl ordinariat da tshessar da sia decisiun. Anzi sesenti el cheutras confirmaus da persister sin quella, essend ch'ins astgi buca tolerar, che elegi midien il liug u benefeci avon che esser approbai digl ordinariat.» Allegond las leschas ecclesiasticas, che disapprobeschan in tal proceder, ha Baal supplicau il vicari episcopal can. de Castelberg a Sumvitg da procurar, che Spescha desisti da sia mira, mo senza cuschunar malaveglia u malruaus en vischnaunca. Duess quei buca reussir, stuessi Castelberg, sco vicari episcopal, «procurar ch'el vegni naven senza retard.»<sup>118</sup>

Canon Castelberg ha schau clamar Spescha tier el a Sumvitg sils 17 da fenadur, per comunicar ad el il cuntegn dalla brev dalla curia. Spescha leva saver las proprias raschuns dil scamond. Sin quei ha Castelberg rispundiu, in conventual sappi vegnir sclaus d'in benefeci secular, era senza raschuns. En siu cass denton seigi il *manuscret encunter il celibat*, ch'el vegli schar stampar, il motiv. Persuenter hagi ins ina perdetga e schizun ina part dil corpus delicti enta maun.» P. Placi ei sin quei staus sco sturnius. El ha rispundiu empau embrugliaus ed ha concediu: «Quella perdetga ei in toc femna (ein Weibsbild) ed il pretendiu corpus delicti ha in um priu da mei.» Sur Castelberg ei lu ius aunc pli lunsch: «Quella scartira porta il tetel «Der wilde Mann», ed ei componida en ina fuorma apologetica.» Ussa eran tuttas stgisas adumbatten e Spescha ha dumandau spir tema, tgei che seigi da far, per survegnir il post a Sedrun. Sin quei ha il vicari episcopal cussegliu da dar en scret la suondonta declaraziun.<sup>119</sup>

---

<sup>116</sup> Acta Capitularia I. pag. 154 als 11 da fenadur 1812: praesentibus omnibus Capitularibus excepto P. Placido, qui nescio qua impeditus causa Sedrunii Aethuatii Parochia remanserat novam chapellaniam ibidem aggressurus.

<sup>117</sup> Archiv episcopal, mappa 100. Plevon Jos. Ant. de Castelberg al cancelier Baal, ils 19 da fenadur 1812

<sup>118</sup> l.c. Cancelier Baal a plevon Jos. Ant. de Castelberg. Sboz. Ils 21 da fenadur 1812

<sup>119</sup> l.c. Plevon Jos. Ant. Castelberg a cancelier Baal. Sumvitg, igl 1 d'uost 1812

«Entras la presenta scartira seobligheschel jeu da mai duvrrar mia pleva encunter la disciplina ecclesiastica e da sespruar da destruir e supprimer, sch'ei fuss avon maun zatgi semigliont. Appertenent las *lamentaschuns da Selva* declarel jeu ed en cass da basegns vegnel jeu era a mussar ora, ch'ellas seigien inventadas e construidas e ch'ellas meretien negina cardientscha e negina feda. Cun questa mia declaronza sperel jeu ch'igl aultreveri ordinariat seigi pacificaus e vegni buca a snegar da surprendre il benefeci a Sedrun silmeins provisoricamein, sch'ei duess ord grevas raschuns buca esser pusseivel formalmein.»<sup>120</sup> Ussa ha era sur Castelberg manegiau da stuer cussegliar alla curia, da surschar a Spescha il benefeci ad interim, ton pli che quel seigi a Sedrun «sut controlla dil plevon e buca pli aschi en prighel dad interprendre enzatgei encunter la disciplina ecclesiastica. Questa mia supplica ei el medem temps era il tgeu desideri da monsignur prenci-avat da Mustér.»<sup>121</sup> Avat Anselm ha manegiau, ins dueigi perinaga laschar P. Placi a Sedrun, senza confirmaziun «aschilunsch, sco sias bunas empermischuns van en vigur.» Sco motiv allgehescha el: «Ins sa buca ir entuorn cun olmas malsaunas sco ins less e duess» («Man kann mit kranken Seelen nicht allemahl verfahren, wie man wollte oder sollte»). Dil reminent ha el surschau tut al curia ed agl avat-visitatur a Nossadunneun.<sup>122</sup>

Ei para che P. Placi seigi s'enriclaus da sia declaronza per scret. El encureva da gudignar il cancelier Baal, cheutras ch'el criticava il canoni de Castelberg. Quel seigi bein in um scolau ed in Tuatschin, mo el vegnessi mai a vegnir elegius leu, pertgei el regi dictatoricamein e

<sup>120</sup> «Durch gegenwärtiges Schreiben verpflichte ich mich, meine Feder wieder die kirchliche Disziplin nicht zu gebrauchen und zu trachten, dass, wofern etwas dergleichen vorhanden seyn sollte, zu zerstören und unterdrücken zu lassen. Was die Klägte von Sälva anbelangt, erkläre ich mich und in Fall der Noth werde ich auch beweisen, dass sie ganz aus Erdichtungen und schiefen Auslegungen bestanden haben, desshalben verdienen sie keinen Glauben und keine Achtung. Ich hoffe somit durch diese meine Erklärung, dass das hochwürdige Ordinariat meinerhalben besänftiget werde und den Zugang zu den Benefizium von Sedrun nicht versagen werden, und zwar wenigsten provisorio modo, wenn es aus erheblichen Ursachen nicht formali geschehen kann.»

Archiv episcopal, mappa 100 P. Placi Spescha alla curia episcopala. Sumvitg, ils 27 da fenadur 1812. Ella brev ei igl adressat buca numnaus. Da Spescha ein ils «schiefen Auslegungen» suttastrihai.

<sup>121</sup> Archiv episcopal, mappa 100. Plevon Jos. Ant. de Castelberg a cancelier Baal. Sumvitg, igl 1. d'uost 1812

<sup>122</sup> l.c. Avat Anselm al cancelier Baal. Mustér, ils 9 d'uost 1812

criticheschi ils spirituals da leu, il plevon Hitz da Sedrun ed era il caplon Wenzin a Rueras, sco el hagi era tractau aschia il caplon da Selva. La finala scriva Spescha dil plevon da Sumvitg: «Quei signur suffla si tscheu e leu il fiug, lai arder el a Cuera e quescha.»<sup>123</sup> Pertinent il celibat carteva Spescha dad astgar dir, ch'ins vegli simplamein drizzar la «veglia disciplina» dalla baselgia suenter la hodierna, e manegiava: «Igl uorden da Diu fuss da preferir a quel dils cartgauns:» P. Placi serefereschi sin «nossa libra e tolerada republica» e damonda: «Tgei sa disturbar pli fetg il public ruaus, che da termetter spiuns e spiunas d'inquisaziun, schizun en casas reformadas, per encurrir igl um selvadi che habitescha mo els uauls e sin las alps e da trer el avon dertgira e spedir el ella perpetnadad»? Spescha fa la remarca spirtusa, che memia bia premura seigi ual aschi da donn sco da mussar negnia premura. Alla fin remarca nies sribent, ch'el hagi, «sco um da sissonta onns, fatg atras els onns d'uiara pli bia che tuts ils spirituals, e ch'el basegni il ruaus e tgi che disturbi quel, cunterfetschi alla carezia cristiana.»<sup>124</sup>

Sco quella brev muossa, vuleva Spescha tuttina ir enzaco a Cannossa. Igl empren eis el ius dus dis suenter a Sumvitg tier canoni Castelberg, il qual el veva giest scurvanau a Cuera, per metter cheu fil en guila. Sur Castelberg ha saviu scriver a Cuera: «Giest compara P. Placi tier mei, intenziunus e decidius dad ademplir sia empermisschun e dad ir per siu manuscret e dad extrader el.»<sup>125</sup> Castelberg aggiunscha, che aschi prest sco quei daventi, sappi el recumandar el per la caplania da Sedrun. En scadin cass seigi da procurar che quei manuscret vegni extradius «et ut occasio scandali tollatur.»<sup>126</sup> Naven da Sumvitg eis el serendus a Cuera sin la temida canzlia. Baal ha prelegiu ad el plaid per plaid las condiziuns. El stoppi en emprema lingia extrader il manuscret dil celibat alla curia ni silmeins mussar in

<sup>123</sup> «Dieser Herr blast hier und hin und wieder das Feuer an, lässt dann es in Chur in Flammen auflodern und schweigt».

Archiv episcopal, mappa 100. Spescha al cancelier Baal. Sedrun, ils 9 d'uost 1812

<sup>124</sup> Archiv episcopal mappa 100. Spescha al cancelier Baal, Sedrun, ils 9 d'uost 1812.

<sup>125</sup> «Soeben erscheint P. Placidus bey mir, willens und entschlossen, sein gethanenes Vesprechen zu erfüllen und bewusstes Manuscript abzuholen und es effectiv zu extradiren.»

<sup>126</sup> Archiv episcopal, mappa 100. Plevon Jos. Ant. de Castelberg al cancelier Baal, Sumvitg, ils 11 d'uost 1812

attestat, ch'el hagi surdau quel a ses superiurs, agl avat, e che quel hagi sez priu a mauns la destrucziun da quel. Dil reminent sappi ins buca promover el positivamein alla caplania suenter talas ideas, ins sappi mo tolerar el perinaga («conniviren») cun la condiziun, ch'el caschuni ni malruaus ni lamentaschuns. Las ulteriuras perscripziuns vegnien a depender dallas circumstanzias.<sup>127</sup> Suenter biabein duas jamnas ha canoni Castelberg cartiu dad astgar scriver a Cuera: «Finalmein» ha P. Placi surdau siu manuscret ed extradiu el agl avat da Mustér. Igl attestat surlunder vegn, sco jeu sperel, a suondar en cuort.»<sup>128</sup> Essend che la scartira ei buca pli avon maun, ni a Mustér ni a Cuera, astgan ins supponer, ch'ella seigi veramein vegnida destruida.

*La discussiun sur dil celibat* mereta aunc da vegnir prida en egl sco tala. P. Placi ha scret surlunder, pli u meins extendiu, en las suondontas scartiras:

1805 ella descripziun dalla Val Tujetsch (PlSp 5 pg. 77, 82—102, 459—462), per part publicau en Spescha pg. 30—32.

1813 Petiziun alla regenza cantunala per protecziun encunter persecuziuns pervia da sia scartira sur dil celibat, Sedrun ils 22 da zercladur 1813.

Il manuscret ha buca pudiu vegnir eruius. (Cp. Spescha pg. CIV)

1815 Collectanea. (PlSp 30b pg. 91—96)

1818 Collectanea. (PlSp 30b pg. 146—149)

Las concernentas parts dalla Collectanea da 1815 e 1818 ein edidas en parts tier Spescha pg. 176—180.

1820 Brev a dr. Jodoc Liberat Steinhauser, plevon a Rueun, decan dil capetel Sursilvan, datum Trun, ils 12 d'avrel 1820. Copia Mustér.

---

<sup>127</sup> I.c. Cancelier Baal e plevon Jos. Ant. de Castelberg. Sboz. Ils 13 d'uost 1812

<sup>128</sup> «Endlich hat P. Placidus gefordertes Manuscript abgegeben und es an Herrn Fürstabtten von Dissentis ausgeliefert. Das Zeugnis dafür wird, wie ich's hoffe, nächstens nachfolgen.»

Archiv episcopal, mappa 100. Plevon Jos. Ant. de Castelberg a Cancelier Baal, Sumvitg ils 30 d'uost 1812. Pertenent la reacziun comp. A SF (32) 4. Avat Anselm agl avat Konrad da Nossadunnaun, ils 20 da december 1817: «Die Retraction des berüchtigsten Manuscripts contra Coelibatum will ihm auch nicht behagen.»

Ordlunder seresulta, che P. Placi ha atgnamein persequitau quei tema per suenter haver legiu egl anniversari da Tujetsch la notizia, ch'in prer da Tujetsch cul num Johannes hagi priu ina dunna ord la schlatteina Busch. Quella novitad ei daveras verificada egl anniversari da Tujetsch entuorn igl onn 1500 (fegl separat tier fol. 39) P. Placi menziunescha ella adina puspei, aschia igl empren 1805, lu 1818 e 1820. Il tema ha denton buca occupau el avon la revoluziun fransa.

Igl ei denton impurtont da remarcar, ch'el patertgava sulettamein als spirituals seculars e mai als conventuals. El sez pretenda, che el vegnessi era suenter la soluziun dil celibat a far negin diever da quella. Perfin sch'el fussi pli giuvens e sensuals, vegnessi el a scher giu nundecidius sco igl asen ella bibla. Quei ha el attestau gia a caschun da sia emprema dilucidaziun dil tema 1805. (cp. Spescha pg. 32 nota ped.) Aschi bia sco igl ei vegniu dau la bucca da Spescha duront sia veta e suenter sia mort, mai han ins reproschau ad el il minim falliment en quels graus, P. Placi era ina persunalitad dil tuttafatg nunsentimentala.

Sias ideas ha Spescha perinaga ord la s. scartira. Che questa fontauna cuntegn buca l'obligaziun dil celibat, ei clar. Ella desegna sulettamein igl ideal. Dils s. paders citescha el tocs ord Ambrosius, Hieronimus e Crisostomus, aschia gia 1805 (PlSp 5 pg. 459—462) e lu 1815 e 1820. El haveva denton buca legiu sez las ovras dils s. paders, mobein priu ils citats ord las lecziuns dil brevier, aschia per las fiastas da s. Gada, Cecilia, e Culastia. El sez sereferescha ina gada sin in text ord il brevier vegl da viadi («im alten Reibrevier») (PlSp 5 pg. 460). Quei muossa mo, co el legeva siu brevier cun tutta atenziun.

Per il suondont temps medieval drova el per il mussament, che la baselgia hagi 1229 e 1564 scumandau als laics da leger la bibla, la prefaziun d'in cudisch «Das neue Testament des Brentano» (PlSp 5 pg. 460). Ei setracta cheu dalla translaziun e declaraziun dil niev testament cumparida 1790 en duas e 1794 en treis parts ed edida da Dominikus Brentano (1740—1797). Spescha pudeva plitost enconuscher questa ovra, essend ch'igl autur era naschius a Rapperswil, veva studigiau el collegi helvetic a Milaun e veva operau pli tard sco caplon curial e cusseglier spiritual dil prenci-avat da Kempten. Ina lavur propi scientifica eis ei buc, mo tuttina ina plascheivla e popula-

ra. Igl autur vala per teolog dil «sclariment» (Aufklärungstheologe) cun tendenzas antipapalas.<sup>129</sup>

Per Spescha ei oravontut papa Gregori VII. quel che ha «destruiu» la anteriura libertad dils spirituals en Tiaratudestga e che ha exequiui sia renovaziun cun gronda breigia mo era cun crudeivladad.»<sup>130</sup> Persuenter ei Spescha sereferius duas gadas sin il historiograf tudestg Schmid (PlSp 30b pg. 91 e brev a Steinhauser pg. 5) Ei setracta da Michael Ignaz Schmidt (1736—1794), in spiritual francon, che veva operau a Würzburg sco professor dalla historia tudestga (dapli 1773) e pli tard sco directur digl archiv naziunal (Staatsarchiv) a Vienna (dapli 1780). Spescha manegia sia historia tudestga (Geschichte der Teutschen), che ei cumparida 1778—1783 en tschun toms ad Ulm che fladescha spert josefinistic e suttastreha tuttaviva la componenta Germana e naziunala.<sup>131</sup>

Secapescha scursanescha P. Placi cheu fetg il svilup e malegia per aschidadir ner sin alv. Dil svilup denter il temps patristic e la reforma gregoriana di el nuot. Per Spescha setractava ei d'anflar mussaments historics per sia idea e buca da declarar l'instituziun ecclesiastica.

P. Placi ei dalla idea, che la reformaziun dil 16. tschentaner hagi simplamein sias ragischs ella introducziun dil celibat sacerdotal. Medemamein seigi la munconza da spirituals da lu, sco era da siu temps da declarar aschia. Cun auters plaids, el less prender la monocausalitad sco principi. Nus vesein cheu, co Spescha era in affon da siu temps. Ch'el ha duvrau l'ovra da Schmidt, che respira andantamein spert dil sclariment, ei gia vegniu menziunau. Sco adherent dallas ideas franzosas, vegn Spescha ad haver saviu mo memia bein, ch'ils Giacubins han dau als spirituals 1793 la pusseivladad d'ina letg civila, ch'ei era vegnida duvrada savens, da maniera che Pius VII. ha dau suenter als clerichers maridai, scumandond denton ad els las funcziuns clericalas.<sup>132</sup> Las undas dalla revoluziun han sbattiu aunc ditg suenter, aschia ch'igl ei vegniu fundau en Silesia ed en Germania meridiunala

---

<sup>129</sup> Sur da Brentano mira Allgemeine Deutsche Biographie 3 (1876) 313 e Lexikon für Theologie und Kirche 2 (1958) 669 s.

<sup>130</sup> Spescha 177

<sup>131</sup> Sur da Schmidt mira Lexikon für Theologie und Kirche 9 (1937) 286 s. e 9 (1964) 434 s.

<sup>132</sup> L.A. Veit Die Kirche im Zeitalter des Individualismus 1 (1931) 346. Lexikon für Theologie und Kirche 10 (1965) 1398

(1826 e 1830) uniuns clericalas, ch'intendevan la soluziun dil celibat. Significont persunter ein ils messadis alla regenza badensa ed agl arzuestg da Friburg igl onn 1828, che han da lur vart puspei provocau repliccas.<sup>133</sup> Quei tut ei succediu dil temps da Spescha. Quellas tendenzas ed ideas han influenzau P. Placi. La scoperta da gliez citat egl anniversari da Tujetsch ha mo dau il stausch, ha forsa era mo surviu sco indroducziun litterara da sias expectoraziuns. Segiramein ha el contribuui en quest connex bein enqual considerabla remarca, aschia per exempel pertenenent las circumstanzias dallas perscripziuns disciplinaras da baselgia, la posiziun unilateral dil pievel, che pretendia dil spiritual sulet il celibat, tolerescha denton ad el tut igl auter eav.

Las ulteriuras inculpaziuns encunter el, sco il negligir il rusari, il diever dalla aua benedida e dil ludar Niessegner eav. ein tuttas appariziuns dil temps, atgnas agl Josefinissem austriac e tudestg-meridional, che eran denton tuttaviva buca en tuts graus nungiustificadas e che cumparan ozildi sco capeivla reacziun sco «sclariment catolic» encunter las fuormas barocas surcargadas.<sup>134</sup> P. Placi era plitost buca in carstgaun dil baroc, mobein dil schinumnu 18. tschentaner realistic e natural.

### 6. *En claustra 1814—1816*

P. Placi era aunc a Sedrun, cura ch'el ha alla entschatta dalla cureisma 1814, secund las prescripziuns dalla regla benedictina, presentau agl avat ses propiests. Originals sco adina, ha el fatg ordlunder in pign tractat, tut suenter paragrafs e sco usitau per latin. Il text secloma translataus: «Propiests da cureisma per igl onn dil salit 1814. A tgei ei il religius obligaus? El sto ademplier la veglia da Diu, extirpar las mendas ed exercitar las vertids. Ei seigi pia. 1. Jeu vi extirpar las mendas, numnadamein tras meditaziun. 2. Jeu vi excercitar las vertids, enten a) carezar il proxim sco memez. b) perdunar igl entiert fatgs a mi ord carezia da Diu, c) dir la verdad, d) urar per vivs e

<sup>133</sup> K. Heussi, Kompedium der Kirchengeschichte 1930 pg. 401. Joh. Adam Möhler, Der ungeteilte Dienst. Ed. nova 1938 pg. 37s, 73 ss.

<sup>134</sup> Veit-Lenhart, Kirche und Volksfrömmigkeit im Zeitalter des Barock. 1956. Mira register p.ex. Rosenkranz, Weihwasser etc. Pertenent il salid «Ludaus seigi Jesus Cr., mira G. Schnürer, Katholische Kirche und Kultur im 18. Jh., 1941 pg. XI e Werner Durrer, Dokumente über Br. Klaus, 1947, pg. 112 agl onn 1482

morts numnadamein cun recitar mintga di las oraziuns allegadas alla litania da tuts ils sogns, ed il psalm de profundis, e) dar almosna tenor pusseivladad. Sina quei che quests propiests restien buca senza fretg e forza, supplicheschel jeu, che auters veglien rugar per mei tier il Diu da tutta misericordia e consolaziun, ch'els possien vegnir exequi e benedi cun la benedicziun paterna. P. Placidus, manu propria.»<sup>135</sup> Gia ord quei document vesein nus, che Spescha aveva tuttavia tschaffau igl essential dalla veta positiv-cristiana. Il text tradescha bein enza tgei dalla predilecziun da siu temps per il moralisar, documentescha denton tuttina, che P. Placi voleva esser in um dalla oraziun. Sco usitau ha igl avat suttascret siu consentiment e sia benedicziun, quella ga denton el senn dalla damonda, sco risposta: «in religius benedictin ei en emprema lingia obligaus dad obedir, sco el ha empermess sollemnamein tenor la regla, che vul ch'el vivi sco auters giudicheschon e camondan (cap. 5 dalla s. regla). Per quei vegli el suondar quest capetel e lu vegni Dieus a benedir sias ovras. Anselmus, abbas.»<sup>136</sup> Aschia veva il stregn avat bein tucchau la noda. La damonda era mo, schebein quella moda pauc psicologica era el cass da gudignar in um aschi dad atgna tempra sco Spescha.

Mo igl avat ha bein fatg quei, per quei, ch'el leva prest clamar P. Placi anavos en claustra e preparar el leutier. Igl avat ha sez confirmau quei: «Schi prest sco la soluziun dils acts dalla mediaziun han purschiu a mi aria frestga e liber maun, hai jeu sfurzau el, encunter tut sias viarclas, da returnar en claustra.»<sup>137</sup> Quei ei daventau il zercladur 1814. Facticamein ei P. Placi serendius suenter la fiasta d S. Placi da Sedrun a Mustér, nua ch'el ei per l'emprema ga dapli 1799

<sup>135</sup> Pl. Sp 46: Proposita Quadragesimalia pro anno reparationis 1814: Ad quid tenetur Religiosus? ad adimplendam voluntatem Dei, ad extirpationem vitiorum et exercendas virtutes. Sit ergo: 1. Volo extirpare vitia, nempe meditando et 2. Volo me exercere in virtutibus: a) diligendo proximum sicut meipsum, b) pro amore Dei remittendo injurias mihi illatas, c) loquendo veritatem, d) orando pro vivis atque defunctis, singulis nempe diebus recitando orationem post Lytanas omnium Sanctorum positas adnexo Psalmo Deprofundis, e) Elemosinas praebendo in quantum possum. Ne vero haec proposita deficiant fructu ac possibilitate, rogo, ut rogent alii pro me apud Dominum omnium misericordiarum et totius consolationis, ut efficiantur et benedicentur paterna benedictione. P. Placidus m.p.

<sup>136</sup> Religiosus Benedictinus primum tenetur ad obedientiam quam solemniter vovit secundum regulam, quae vult ut alieno vivat Iudicio et Imperio, Cap. 5 Sacrae Regulae, hinc huic Capiti se conformet et tunc Deus benedicet operibus Tuis. A (nselmus) A (bbas).

<sup>137</sup> A SF (32) 6. Avat Anselm agl avat Konrad Tanner, ils 28 d'ust 1818

setenius si pli ditg. La liunga assenza veva buca fatg el pli sozials, el steva en claustra da siu persei e viveva plitost sc'in eremit che sc'in cenobit.<sup>138</sup> Empau era quei vegniu cun la vegliadetgna. Nuottatonmeins separticipava el als capetels dil convent, sco quei era sia obligaziun.<sup>139</sup> Medemamein anflein nus el ad exercezis.<sup>140</sup>

Cura ch'el vegneva vidlunder, fageva el era il survetsch divin en baselgia. Aschia savein nus, ch'el ha fatg siu uffeci a caschun d'ina processiuon dil vitg en claustra ils 14 da fenadur 1816. La processiuon ha fatg en baselgia claustrala las viaspras e ritschiert la benedicziun ed ei lu ida cun la reliquia dil tgau da S. Placi en baselgia da Nossadunna, fertont che las mattauns cantavan la litania lauretana. P. Placi ha fatg ina cuorta allocuziun e circumscret igl intend da questa devoziun. Muort la continuonta aura freida veva la biestga buca da magliar sillas alps, e fein era ei buca avon maun. Silsunter ha el schau recitar tschun paternos e salidadas. Sunter il Salve Regina ei la processiuon returnada en baselgia gronda, nua ch'ins ha cantau il himni e l'oraziun tier ils sogns patruns Placi e Sigisbert. Lu ei la processiuon returnada ella parochiala. In Josefinist e libertin fuss strusch sedaus neu per quei. Cura ch'il convent ha gratulau communablamein agl avat per il niev onn, tenor usit per la fiasta da Buania 1816, ha Spescha sco senior fatg quei igl εμπрем.<sup>142</sup> Igl atun dil medem onn ha el denton giavischau dalla congregaziun svizra dils benedictins ina visitaziun «pervia da negligentscha dalla disciplina claustrala ed usurpaziun da dretgs capitulars.» Gia igl avat da Rheinau, al qual Spescha ha inviau siu giavisch, ha manegiau, che la caussa seigi buca aschi urgenta e dil reminent sappi ins capir sut «uorden claustral» diversas caussas.<sup>143</sup> Che P. Placi teneva denton adina sin sia moda cun la claustra, demuossa era il fatg, ch'el ha mess a disposiziun sia

---

<sup>138</sup> AC II. 10 tier igl onn 1814: Hoc fere tempore sub finem mensis Junii R. P. Placidus Capellaniae in Sedrun valedixit ad mandatum Reverendissimi Abbatis et post festum SS. Patronorum denuo prima vice post monasterii desolationem vitam eremiticam in conventu nostro vivere coepit cum caeteris RR.DD. Capitularibus.

<sup>139</sup> AC II. 25, 30, 33 agl onn 1815. Al Semicapitulum dils 15 da fevrer 1816 ha el muncau: medicinis utens non adfuit. L'auter di era el presents. AC II. 71 s.

<sup>140</sup> AC II. 39 als 12 da fenadur 1815

<sup>141</sup> AC II 112, als 14 da fenadur 1816

<sup>142</sup> AC II. 61 als 6 da schaner 1816

<sup>143</sup> A SF (32) 3. Avat Januarius Frey agl avat da Nossadunnaun, ils 20 da settember 1816. Leutier AC II. 123, november 1816, e A SF (32) 4. Avat Anselm agl avat Konrad, ils 20 da december 1817

collecziun da crappa (cristallas?) en favur dalla decoraziun dalla baselgia.<sup>144</sup>

La claustra gidava da lezzas uras bia ella pastoraziun, aschia era enta Medel cura ch'il plevon era absents ni ch'il caplon da Curaglia muncava.<sup>145</sup> Aschia ha P. Placi funzionau a Platta enstagl dil plevon dils 28 da matg tochen igl 1 da zercladur 1816, nua ch'el ha giu ina sepultura e treis battens. Sias inscripziuns els cudischs parochials enconuschan ins buca mo vid sia scartira caratteristica, mobein era vid siu stil original (p. ex. baptizans fui).<sup>146</sup>

### 7. A Trun 1816—1833

A Mustér ha P. Placi entschiet per l'emprema ga a vegnir mal-sauns d'ina malmaneivla malsogna cun inflamaziuns a marscha («Hauptfluss von Eyter und Geschwulst»). En cunvegnientscha cun in chirurg eis ei reussiu ad el da survegnir digl avat la lubientscha da seretret a Trun, per saver semirar tier meglier ella cuort claustrala. Aschia sesanfla el leu dapli la fin october 1816, tgiraus digl econom claustral a Trun, P. Adalgott Waller. La malsogna era buca mo mulestusa, mobein era cuzzeivla. P. Placi ha consultau buca meins che siat miedis. Dapli igl avrel 1817 eis ei vegniu empau meglier, mo per igl uost 1817 ha el fatg ina cura da bogn a Faveras.<sup>147</sup> Alla fin 1817 ha igl avat saviu dar bunas novas: «ussa ei P. Placi puspei sauns da tgierp.» Mo dapli sia reconvalescenza, la primavera 1817, ha el entschiet a vuler esser independents, havend negina inclinaziun pli alla veta claustrala, sco avat Anselm ei sez s'exprimius («dem Klosterleben abgeneigt»). El leva buca esser dependents dil cuost e dalla direcziun da P. Adalgott. Siu intend era da retrer la *casa caplania da Trun*. Quei intent ha el persequitau sin sia atgna moda, ch'igl avat ha num-

---

<sup>144</sup> AC II. 66 agl onn 1816: P. Placidus asseruit, se lapides et colore et splendore varios habere, hos se daturum ad construendum altare in modum cryptae. Questa notizia ei da differenziar da AC II. 190 agl onn 1818 conc. cristallas agl altar dalla baselgia da Nossadunna. Comp. Flurin Maissen, *Mineralklüfte und Strahler der Surselva*, 1955 p. 134

<sup>145</sup> AC II. 97, 113 agl onn 1816

<sup>146</sup> Inscrizziuns dils 28 da matg (sepultura), dils 30 da matg (duas ga) e digl 1. da zercladur 1816

<sup>147</sup> A SF (32) 6. Avat Anselm agl avat Konrad Tanner, ils 28 d'uost 1818 (mirond anavos). Leutier AC II. 120 october/november 1816. Spescha 174

nau in «aventurus siemi» («eine abentheuerliche Austräumung»)<sup>148</sup> Duront ils 15 onns dapli siu retuorn dad Innsbruck haveva el sin ils divers posts da pastoraziun spargnau ensemen enzatgei daners. Quei era il schinum nau peculium, che era en usit en claustra da Mustér dapi la fin dil 18. tschentaner.<sup>149</sup> Per 1500 flurins eis el vegnius da cumprar la casa da litinent Conradin de Caprez. 1000 flurins duei el immediat haver pagau persunter en daner. Cun in document, ch'el ha sez scret, ha el ussa schenghegiu quella casa alla pleiv da Trun sco casa caplania.<sup>150</sup> Persunter ha el schau eleger dalla pleiv sco caplon per veta duronta.<sup>151</sup> Surlunder ei igl entir convent s'irritaus. Igl avat ha smanatschau cun la suspensiun «a divinis», sch'el muossi buca il contract da cumpra e da schenghetg ed indicheschi buc il stan da sias finanzas.<sup>152</sup>

Cheu vein nus in semgiont proceder sco 1801, cura che P. Placi vuleva aquistar il benefeci da Rumein per veta duronta entras las autoritads dalla Helvetica. El giavischava da star a Trun per stabel, senza esser visaus sin la claustra. Igl ei era significont, ch'el ei quasi el medem temps staus persunter, che la claustra surprandi la pleiv da Mustér al capetel claustral dils 8 da november 1817, pertgei era il pievel giavischi quei. Ei seigi la luschezia dils purs, sch'els sappien tener biaras vaccas en nuegl. Aschia sto era la claustra senezegiar dalla favoreivla caschun per survegnir il da viver per dus conventuals ord las intradas da la pleiv. Ei gl'ei era ina gronda honor per la claustra, sche dus da ses conventuals administreschan l'emprema pleiv en Surselva, e sch'els occupeschan sils capetels rurals denter il clerus igl empren plaz.<sup>153</sup> Facticamein ha la claustra era surpriu la pleiv da Mustér igl onn suondont 1818.<sup>154</sup>

<sup>148</sup> A SF (32) 4. Avat Anselm agl avat Konrad Tanner, ils 20 da december 1817.

A SF (32) 6. Avat Anselm ad avat Konrad Tanner, ils 28 d'uost 1818

<sup>149</sup> Iso Müller. Die Fürstabtei Disentis im ausgehenden 18. Jh., 1963 pg. 79, 81

<sup>150</sup> AC II. 135 als 12 da zercladur 1817 e pg. 191, fenadur 1818. El medem liug, pg. 236 ils 2/3 d'avrel 1820 vegn la situaziun dalla cas circumscreta pli exact: villa supra vicum Throni ad dexteram Ferrera amnis praeterfluentis ripam sita, vulgo Pustgiet sura.

<sup>151</sup> AC II. 136 alla fin da zercladur u entschatta da fenadur 1817

<sup>152</sup> AC II. 137 fin fenadur 1817

<sup>153</sup> AC II. 146, 153—155, als 8 da november 1817

<sup>154</sup> Pli bia el Bündner Monatsblatt 1966 pg. 259—274, specialmein 265, 267 s. sur da Spescha.

Igl avat Anselm ha termess siu econom, P. Ursicin Genelin, buca meins che treis ga a Trun per volver l'intenziun da P. Placi. Spescha ha fatg valer, ch'el hagi gie la lubientscha digl avat, dad applicar siu spargn per buns intends tenor beinmanegiar. Igl avat ha rispundiu, el hagi dau quella lubientscha mo per applicaziuns alla claustra e quei mo sut la condiziun da siu consentiment. P. Placi ei buca staus da converter ed ei sereferius als visitaturs. Ussa ei era igl avat seviults alla *congregaziun benedictina* ed ha termess P. Ursicin a Nossadunneun tier igl avat Konrad. Quel dueva metter P. Placi enzanua en ina claustra ordeifer il Grischun. Quei seigi era il giavisch dil convent.<sup>155</sup> Quei veva igl avat scret gia enzacons meins avon a Nossadunneun: «Ei fuss per nossa claustra ina gronda grazia, sche Vossa Grazia savess metter nies P. Placi enzanua en ina claustra en Svizra, nua ch'el vess negin contact pli cun nos amitgs dalla claustra, laics ni parents. Per il confessional, per la musica e per perdegar fuss el en scadin cass habels. Jeu supplicheschal Vus instantamein per questa grazia.»<sup>156</sup> Dils 28 d'uost tochen ils 8 da settember 1818 ei P. Ursicin staus a Nossadunneun. Reportau ha el sulettamein, ch'igl avat Konrad hagi admoniu P. Placi tras ina brev e cussegliau urgentamein da sereconciiliar cun la claustra, tshelluisa vegnien tuts ses marcadems a vegnir suspendi. Possess e dretg dueigi star el status quo. Avat Tanner concluda: *ad visitationem appellasti, ad visitationem suo tempore venies.*<sup>157</sup>

Essend che P. Placi secarteva malgrad sia appellaziun alla congregaziun dad esser cuvretgs, ha el buca dau suenter ed administrava gia quels schinumai beins da dotaziun, ch'el considerava sco ina specia da domena social-economica. Dapli 1817 ha el entschiet a collectar per ina casa pauperila a Trun e s'occupava fetg cun las minas da

<sup>155</sup> A SF (32) 6 avat Anselm agl avat Konrad, ils 28 d'uost 1818. AC II. 191 fenadur 1818

<sup>156</sup> «Es wär wohl für unser Kloster eine grosse Gnad, wenn Eure Liebden unsern P. Placidus irrendwo in eine Kloster der Schweyz versorgen könnten, wo er keinen Umgang mehr mit unseren Klosterfreunden, Weltlichen oder Verwandten, haben könnte. Zum Beichtstuhl und Music, wie auch zum Predigen wär er alzeit tauglich. Ich bitte Hochselbe sehnlich um diese Gnad.»

A SF (32) 5 avat Anselm agl avat Konrad, ils 9 d'avrel 1818. Cheutier AC II. 192 als 28 d'uost ed als 8 da settember 1818

<sup>157</sup> A SF (32) 6. Avat Anselm agl avat Konrad, ils 28 d'uost 1818 e lièn il sboz, senza datum dalla brev digl avat Konrad a P. Placi.

metall da Punteglias.<sup>158</sup> Quei rinforzava la posiziun da Spescha, pergei el secarteva dad esser sufficientamein segiraus dil sforz regular entras la respectabla associaziun e sco promotur dallas minieras da Punteglias (als «Triebfeder der in Trons erfundenen Eisenmineralgruben, durch dessen ansehnlichen Associations-Gliedern hinlänglich vor dem regulären Zwang gedeckt zu seyn.») Igl avat ha cussegliau agl avatpreses da termetter a Spescha in recent «Monitorium sub poena suspensionis ipso facto incurrenda.» Il cunfar da Spescha a Trun characterisescha el culs plaid: «Gestützt auf eine Illuminaten-Partey, Mineral-Associerten und des Herrn Landrichters Latours ersten Klosters-Wiedersachers und seines innigsten Freunds, pocht er über alle, schwärmt täglich in Trons.»<sup>159</sup> Cauligia Pieder de Latour combatteva da lezzas uras oravontut il dretg d'ierta dalla claustra.<sup>160</sup> Aschia eran ins zun vilaus en claustra sur da P. Placi ed ha buca envidau el ni als exercecis igl october 1818 e 1819 ni agl impurtont capetel, che veva da tractar il possess da Valtina il fenadur 1819.<sup>161</sup>

Igl avat da Nossadunneun haveva a sias uras concediu a Spescha da purtar avon al capetel dalla congregaziun sias lamentaschuns. Ils 24 da matg 1819 ha in tal capetel giu liug a Nossadunneun. Gnanc igl avat Anselm ha saviu prender part da quel, essend ch'el ha retschiert l'invitaziun memia tard.<sup>162</sup> Aschia vegn ei era ad esser iu cun Spescha, sch'el ei insumma vegnius clamaus.

La finala ha prelat Huonder termess als da Trun ina brev, cun la quala el ha smanatschau ch'el vegni buca a termetter pli in caplon a Nossadunna dalla Glisch, sch'els declarien buca la donaziun da Spescha per nunvaleivla. Trun ha termess representants tier gl'avat. L'audiencia ha giu liug ils 7 da december 1819. Quels han plitost teniu cun P. Placi, aschia ch'igl avat, che pretendeva l'annulaziun immediata dalla donaziun, ha contonschiu nuot. Sin quei ha avat Anselm propo- niu da schar decider ils visitaturs dalla congregaziun. Ils da Trun vulevan denton buca renconuscher quels avats sco lur derschaders e

<sup>158</sup> Archiv episcopal, mappa claustra Mustér. Spescha alla curia episcopala, ils 14 da zercladur 1819. Cheutier comp. era P. A. Vincenz, *Historia della vischnaunca de Trun*, 1940 pg. 61 s. e 103

<sup>159</sup> A SF (32) 7. Avat Anselm agl avat Konrad, ils 15 da december 1818

<sup>160</sup> Bündner Monatsblatt pg. 196—214

<sup>161</sup> AC II. 194, 209, 216

<sup>162</sup> A SF (32) 8. Avat Anselm agl avat Konrad, ils 26 da matg 1818

superiurs competents, mo ord engrazieivladad enviers l'abbazia eran els promts dad acceptar lur sentenza, aschilunsch sco la vischnaunca da Trun approbeschi quei.<sup>163</sup>

La congregaziun ha entschiet cun metter P. Placi sut pressiun e siu secretari P. Bernard Foresti, in pader da Nossadunneun, ha tarmess in «monitori» ad el, declarau siu marcadem per nunvaleivels e schizun punibels. Sch'el sessuttametti buc a siu avat, vegni ins ad applicar auters mieds encunter el.<sup>164</sup> In meins pli tard, ils 24 da mars 1820, ei Conradin de Caprez sez ius tier igl avat per intervegnir, tgei che seigi ussa da far, essend che la congregaziun hagi declarau il contract per nunlubius e nunvaleivels. El ha proponiu che la claustra dueigi salidar il confrar, e far si la casa alla cuort claustrala. Sche quei seigi buc pusseivel, vegni el a dar anavos ils daners ni in convalent alla claustra e «pli bugen prender anavos sia casa che sescagnar cun la claustra pervia da quei contract.»<sup>165</sup> La vischnaunca da Trun ha gia ina jamna pli tard decidiu en disfavour da P. Placi. Ils geraus han returnau al pader il document da donaziun.<sup>166</sup>

Suenter quella fetg malemperneivla historia vuleva Spescha svanir ord Trun. El ha pudiu perschader ils parochians da Peiden dad acceptar el sco lur caplon. Tenor sia pretensiun havevan ton igl uestg sco igl avat dau leutier lur consentiment. Sco «caplon da Trun resignau» rapporta el quei a Nossadunneun buca senza remarcar, ch'el seigi «sereconsiliaus dil tut cugl avat.»<sup>167</sup> Ei selai denton buc anflar in soli document, che comprovass sia pastoraziun a Peiden. Igl avat Anselm ei aunc alla fin da 1820 staus necessitaus dad admonir el dad interprender «ils plans intenzionai.» Tgei ch'el ha atgnamein manegiau cun quei savein nus buca exact.<sup>168</sup> Probabel setractava ei puspei da midar casa. Nus astgein denton tutttavia buca representar nies pader da quels onns sco vegliurd resignau. Sia energia fisica demuossa sia pernoctaziun aventurusa sin 2424 m sin la Greina igl onn 1820, mond da leu en duas uras e mesa gigins a Vrin per celebrar leu il

<sup>163</sup> AC II. 229 als 7 da december 1819. Comp. el medem liug pg. 232 als 14 da mars 1820 (conc. Nossadunna dalla Glisch)

<sup>164</sup> A SF (32) 9. P. Benedikt Foresti a P. Placi Spescha, ils 26 da fevrer 1820

<sup>165</sup> AC II. 233 s. sut ils 25 da mars 1820 (consultaziun)

<sup>166</sup> AC II. 236 s. als 3/4 d'avrel 1820. El medem liug pg. 238 als 23 d'avrel 1820 Spescha vul gidar ora ella pastoraziun a Zignau.

<sup>167</sup> A SF (32) 10. P. Placi agl avat Konrad, Trun, ils 16 da settember 1820

<sup>168</sup> A SF (32) 11. Avat Anselm agl avat Konrad, ils 11 da december 1820

survetsch divin.<sup>169</sup> Quei demonstrescha sia mentalitad religiosa. In libertin el ver senn fuss staus sils cuolms. Sia forza spirtala denton documentescha sias ovras litteraras da quei temps, ton igl onn 1820 sco suenter. Sch'el ha era tractau per part ils medems temas, eis ei tuttina ina enzenza da spirtusadad, sch'ins sesprova da sviluppar els adina puspei d'in niev aspect anora.<sup>170</sup>

Nus havein da P. Placi puspei enzacontas notizias ord igl onn 1825, cura ch'el s'interessava dalla *casa caplania*. Quei era gie adina siu siemi. Tenor sia perdetga ei quella casa vegnida schada a tscheins dapli la partenza dil caplon Jakob Leimbach (1770) e stada habitada da laics, conjugals, hermers, ustiers e mistergners. Quels han buca schanegiau la «casa jastra» aschia ch'ella mava en decadenza e veseva ora sco in «pauper Spital.» Entuorn 1818/19 ei Spescha sepurschius alla suprastanza da vischnaunca da retrer la casa, sch'ins vegli reparar ella, aschia «ch'in spiritual sappi habitar decentamein lien.» P. Placi ha motivau sia proposta cun dir, ch'ils fundatur dalla caplania hagian destinau la casa per il caplon (Frühmesser), buca denton per schenta mundana. La vischnaunca ha empermess la reparatura, ha denton interpriu nuot. Consequentamein ei la casa aunc ida pli fetg en decadenza, tonpli ch'ins ha aunc lubiu da far ord il tschaler in nuegl da pors ed indrezs sanitar.<sup>171</sup>

P. Placi vuleva far restaurar la casa caplania, per lu sez seretreter ord la cuort ed en quella.<sup>172</sup> El sez vul perschuer cun dir, ch'el sappi buca tolerar quella «indecentadad» vid la casa caplania e quei ton pli, sco el pretendeva, che Leci Giger, il fundatur dalla caplania 1631, seigi staus parents cun ses antenats.<sup>173</sup> Cura ch'ils spirituals da Trun ein ils 6 da mars 1825 vegni en reelecziun, ha P. Placi tschentau ils parochians avon las letgas: «U che Vus figeis uorden e dismetteis igl abus e scheis intrar mei en casa caplania, ni che vus saveis cun S. Gieri mirar per in auter caplon.» («Entweder schaffet den Missbrauch ab

<sup>169</sup> Spescha 329. Comp. 326, 328

<sup>170</sup> Spescha pg. CVI ss. Ch'el ei restaus a Trun, muossan las scartiras dil december 1821

<sup>171</sup> Archiv episcopal, mappa claustra Mustér, Spescha al cancelier Baal, ils 23 d'avrel 1825

<sup>172</sup> l.c. Rapport al cancelier Baal sur da Spescha. 1825

<sup>173</sup> l.c. P. Spescha al cancelier Baal, ils 23 d'avrel 1825. Arriguard la caplania mira P. A. Vincenz, Historia dalla vischnaunca da Trun, 1940, pg. 33 ss. Il stemma dils Speschas d'entochen ussa ei insufficient. Annalas 77 (1964) 132

und verschaffet mir in dem Kaplaneihaus Platz oder von St. Georg an sehet (Euch) um einen anderen Kaplan um») El sappi buca mirar tier, co las casas dils augsegners vegnien maltractadas e tartignadas. La redunonza ha confirmau unanimamein P. Placi ed ha empermess da schar restaurar la casa sch'el vegli retrer ella, mo ha interpriu ual aschi pauc sco avon sis onns. Perquei ei Spescha seviults ils 23 d'avrel 1825 per agid alla curia episcopala.<sup>174</sup> En principi vuleva il cancelier Baal sustener la reparaziun dalla casa ed ha perquei aunc dumandau Spescha, tgi che hagi atgnamein avon 20 ni plirs onns schau ir gliued jastra en casa caplania e tgi che hagi retratg il tscheins. Plinavon vuleva la curia saver, schebein quel, che hagi buca habitau ella, vegli ussa duvrrar ella ni in auter.<sup>175</sup> A Cuera enconuschevan ins il caplon da Trun gia da ditg e vuleva buca semetter tschoccamein en difficultads e nunpusseivladads.

P. Placi ha buca schau spitgar sin la risposta ed ha detg ch'il bia habitavien leu paupers conjugals u mistergners, che pagavien mo pauc tscheins. Tenor l'intenziun dils donaturs seigi ina casa parvenda destinada per spirituals e buca per seculars e dapli temps immemorabels eri ei usitau en Surselva, da serrar las casas parvendas, sche negin spiritual eri cheu, denton la ranveria hagi puspei aviert ellas e «il spiritualesser ei cheutras sprezzaus.» La vischnaunca seigi secund vegl usit obligada da mantener las casas parvendas. Mo ussa seigi la caplania da Trun en in schi grond schischuri, che la vischnaunca interpretendi nuot, sch'igl ordinariat stauschi buca ella. Siu ceterum censeo seclo-ma: «Meine Vorältern haben diese Pfrundt, wie die alte Schrift ausweist, aus Gottes Ergebung gestiftet.»<sup>176</sup>

Era il *clerus secular* ha orientau la curia. Sche P. Placi prendi il secuntener dil pievel sco pretext per ir naven, sche sappi ins sedumandar, tgi che seigi da deplorar pli fetg, el ni il pievel. Spescha hagi giu tons benefecis e mai gudiu els pli che in dus u treis onns. Sia lavur e stenta ella pastoraziun vegni era il meglier pievel mai a renconuscher. Pertgei: «wenn ein Geistlicher, ohne andere Sachen zu berühren, Kirchen ein und Kirchen aus gehet, ohne Access und Recess zu bethen, als wenn die Kirche ein Pestilens-Haus wäre, so kann der Geistliche mit

<sup>174</sup> l.c. Spescha alla curia episcopala, ils 23 d'avrel 1825

<sup>175</sup> l.c. Curia episcopala a P. Placi Spescha. Sboz. Ils 19 da matg 1825

<sup>176</sup> l.c. P. Placi Spescha agl ordinariat episcopal, ils 29 da matg 1825

gutem Grund keine grosse Heiligkeit vom Volk erwarten.» Mo ussa hagi P. Placi in auter motiv da far reparar la casa caplania, che seigi en verdad buca en bien stan. «Allein wer hat über 30 Jahr das Haus um den Zins verlassen und wer hat den Zins gezogen?» Buca la vischnaunca, mobein il caplon e siu survegilader, P. Adelgott, hagian fatg quei. Per quei astgien ins buca dar la cuolpa en negin grau alla vischnaunca. Aschiditg sco conventuals hagian occupau la caplania da Trun, hagian quels adina residiau ella cuort, per haver leu cul pader si Nossadunna dalla Glisch ina meisa ed in tener-casa, e quei daventi aunc oz. Pertgei duessi lu la vischnaunca aunc restaurar la casa e far expensas, sulettamein per schar habitar lien laics jasters? P. Placi hagi l'ordra da ses superiors da habitar ella cuort ni da returnar en claustra, e havessi el buca giu quei camond, sche havessi el gia daditg bandunau Trun, sco el ha gia bandunau auters benefecis, senza clamar en agid la aultreverida curia. Quei seigi era la raschun, pertgei la vischnaunca laschi buca reparar la casa.

Igl exponent dil clerus, bein il plevon da Trun sez, cussegia al cancelier da rispunder a P. Placi, ch'el dueigi termetter alla curia ina lubientscha formala digl avat, ch'el astgi bandunar la cuort ed intrar en casa caplania e lu vegni era la curia ad effectuar, che la vischnaunca repareschi la casa. «Quella lubientscha survegn el denton buc, pertgei el ei destinaus da habitar ella cuort sut surveglionza da P. Adalgott e cun quei ei lu la caussa finida.» Duess denton P. Placi tuttina survegnir la lubientscha, sche vegn era la vischnaunca a far il siu, pertgei ella ha gia empermess da rugalar la casa. Il scribent damonda aunc il cancelier, scheibein el hagi documents arriguard las obligaziuns dil caplon, pertgei P. Placi pretendi da haver neginas autras obligaziuns che la messa marveglia.<sup>177</sup> La brev vegn bein ad haver terminau l'entira dispeta pervia dalla casa caplania. Spescha ei restaus sco adina a Trun, ella veglia biala cuort claustrala. Ch'in um en quels onns ha saviu haver tals giavischs, ei capeivel e perdunabel.

In onn suenter quella discussiun casa caplania ei igl avat Anselm Huonder morts ils 9 da matg 1826. Per commissiun dalla congregaziun benedictina svizra ha igl avat Placi Pfister da Faveras ensemen

---

<sup>177</sup> I.c. Rapport, arriguard la damonda dalla caplania e P. Placi Spescha, al cancelier Baal. Senza suttascripziun, adressa e tetel per latin, il text per tudestg. 1825

cul secretari dalla congregaziun, P. Bernard Foresti, fatg ils 20 da zercladur 1826 ina *viseta a Mustér*. Il di suenter ha giu liug l'elecziun digl avat, ord la quala P. Adalgott Waller ei sortius sco niev dignitari. Ual quel, sut il qual P. Placi ei staus dapli 1816 a Trun. Il niev avat ha priu part dalla *redunonza dalla congregaziun a Rheinau* ils 7/8 d'uost 1826.<sup>178</sup> Leu ha il visitatur da Faveras rapportau, che P. Placi hagi caschunau il davos temps nundumbrevilas malemperneivladads, mo el ha aggiunsiu, che quei pader seigi da perstgisar, pertgei ins stoppi tuttina crer, ch'el seigi buca dil tut endretg el tgau.<sup>179</sup> Al secretari dalla congregaziun ei vegniu surdau da scriver ina brev. Quei ha el fatg ils 14 da november 1826. Nus legin cheu: «Las lamentaschuns e lur raschuns ein vegnidas acceptadas attentamein e beinvulentamein. Per dir la verdad: ellas ein buca ual aschi grevas, che l'autoridad dalla congregaziun fuss necessaria per liquidar ellas.» Ei seigi sufficient da surdar la caussa al niev avat. Ils avats han exprimiu la perschasiun, «ch'ei dat buca biars confrars en nossa congregaziun, che gauden tontas favurs, cumadeivladads materialas e privilegis sco Vus, reverend, gudis. Ei fuss gie da seturpegiar, sch'ins vuless encurir da mitschar da tuttas difficultads e malemperneivladads, dallas qualas ins sa fugir negliu.»<sup>180</sup> P. Bernard consolescha siu confrar a Trun: «Igl ei mo inatentaziun, che mudregia Tei.» Alla fin accentuescha il secretari dalla congregaziun el senn dalla «Imitaziun da Cristus»: «Negin en quest mund ei senza tribulaziun e sch'el fuss era retg ni papa. La veta d'in bien conventual ei ina crusch.»<sup>181</sup>

En quella fatschenta da caplania eis ei semussau claramain, che P. Placi, en ses vegls onns, era buca pli dil tut en possess da sias forzas spirtalas, giest sco il visitatur da Faveras haveva constatau. Tgi che

<sup>178</sup> Jahresbericht der hist.-ant. Gesellschaft von Graubünden 94 (1964) 1—13

<sup>179</sup> A SF (33) 4. Rapport dalla redunonza dalla congregaziun dils 7/8 d'uost 1826. Sed innumera damna pertulit ultimis temporibus P. Placidus Spescha, excusandus, quia potius sane rationis minus compos censendus.

<sup>180</sup> Persuasum erat Reverendissimis ex iis, quae referebantur, non multos in Congregatione nostra Confratres iis favoribus, commodis temporalibus, privilegiis frui, quibus Paternitas Tua Plurimum Reverenda fruitur. Et turpissimum esset, omnes omnino fugere velle difficultates, omnia incommoda, quae nullibi devitari possunt.

<sup>181</sup> A SF (32) 8. Il secretari dalla congregaziun a P. Pl. Spescha. Nossadunnaun ils 14 da november 1826

legia sias brevs, sco per ex. quella a decan Steinhauser 1820 e biaras autras, arriva alla ferma perschasiun, che Spescha piteva propi dalla tema d'esser persecuitaus, (Verfolgungswahn) ina malsogna, che ei sefatga valer exact suenter siu retuorn ord igl exil, igl εμπrem buca schi recent, suenter denton adina pli e pli fetg. Cun l'aulta vegliadetgna vegneva ei mender. Ins ha perquei dad esser fetg precauts enten giudicar la personalitad da Spescha. Buca per nuot prendevan ses confrars dil convent el buca schi serius. Ina gronda influenza haveva el buca en claustra. Per gliez era el gia da natira anora memia da siu persei. E cun ils onns, suenter ver ademplier il 50, eis el daventaus in pauper querulant. Quei duei denton buca impedir nus, da renconuscher sias profundas enconuschientschas e qualitats spirtalas.

P. Placi ei restaus caplon a Trun entochen sia *mort*, la sera dalla vigelgia dalla Assumziun da Maria, *ils 14 d'uost 1833*. Sia mort rapporta il cronist claustral sco suonda: «Ils 14 da quest meins ei miert en nossa cuort claustrala a Trun, consumaus dalla vegliadetgna, nies senior e giubilar R.P. Placi Spescha da Trun ella vegliadetgna da 81 onns, el 59avel da siu profess ed el 52avel da sia ordinaziun sacerdotala. Ils 16 eis el vegnius satraus ella baselgia parochiala da S. Martin d'ina vart digl altar dalla s. purschala Brida entras igl aultreveriu honoratissim plevon dil liug Giachen Franzestg Gieriet, canoni da Cuera e vicari episcopal (vicario forneo), en preschientscha da treis da nos confrars e da quater spirituals seculars. Ils 17 han ins celebrau ella baselgia parochiala a Trun, en preschientscha dils medems, la messa dil tierz. La messa digl otgavel e dil meins denton han ins fatg en baselgia claustrala, nua ch'ei vegn tenor usit legiu dils confrars ina messa gregoriana (trigesimus gregorianus). Dieus seigi ad el grazius e misericordeivels. (Deus sit ei propitius et clemens).<sup>182</sup>

Ils necrologs els acts da capetel ein secapescha tuts buca ual liungs e per ordinari senza stravaganzas. Ins comparegli per ex. ils necrologs per P. Martin Riedi e P. Ursicin Genelin, morts 1831.<sup>183</sup> Els ein denton aunc adina pli extendi, indicheschan igl uffeci dil defunct, descrivan sia malsogna e la sollemnidad dalla sepultura. Alla fin stat per P. Martin Riedi simplamein: requiescat in pace. Compareglian ins cun-

<sup>182</sup> AC III. 74 als 14 d'uost 1833

<sup>183</sup> AC III. 46 (P. Ursicin Genelin), pg. 51 (P. Martin Riedi), pg. 141 P. Benedetg Soliva).

tegn e lunghezia dil necrolog per il subprior e musicher P. Benedetg Soliva († 1836), sche se presenta quel per P. Placi sco in contrast. La supplica alla fin per grazia e misericordia ei memia penetrona per buca curdar en egl. Mo era schiglioc sa il cronist buca annunziar che in impurtont amitg ni in um da siu rom fussi separticipaus alla sepultura. Empau ei quei capeivel. Ils confrars han stoviu surportar extra ditg il malruasseivel ed agen pader e la claustra ha giu bia difficultads cun el. Igl avat Anselm ha astgau constatar, ch'el hagi «adina risguardau P. Placi cun schanetg e special delicat tractament en consideraziun da siu character fisic e moral.»<sup>184</sup> Ins sto denton era conceder che prelat Huonder sez era in um zun energic.<sup>185</sup> Pér en distanza, suenter ch'ins veva emblidau bia, han ins entschiet a veser il grond e bien vid P. Placi. Grond e bien era buca mo siu scrutar ed encurir sin terren natural-scientific e geografic, sias ideas socialas e caritativas, mobein la finala tuttina era sia perseveronta fideivladad a sia vocaziun sacerdotala e benedictina.

Igl ei stau sia tragica, ch'el ha buca pudiu secalmar e sesclarir pli fetg vegnent pli vegls. La cuorsa da sia veta ei ida il cuntrari da quella da siu contemporan e confrar P. Baseli Veith.<sup>186</sup> Mo quei svelto e hilaric Suv haveva artau in character pli lonzi che nies grischn da lenn dir.

---

<sup>184</sup> A SF (32) 6. Avat Anselm agl avat Konrad, ils 28 d'ust 1818

<sup>185</sup> Biografia en Zeitschrift für Schweizerische Kirchengeschichte 59 (1965) 113—162

<sup>186</sup> Biografia en Studien und Mitteilungen des Benediktinerordens 76 (1965) 1—21.